



Lerato La Makgonthe

Taba ya baratani Bibeleng

Adrian Ebens

Lerato La Makgonthe

Taba ya baratani Bibeleng

Kgaolo 1 – Go tloga goweng ga motho go fitlha go šegofatšweng ga Aborama

Bafetoledi ke Odirile le Omametse Makhura



adrian@life-matters.org

Dikagare

1. Lerato la Makgonthe	3
2. Ba sa tsebe dihlong	7
3. Ka go swantšha ka rena – Sekaelo Sa Modimo	11
4. Moloji le Moithuti wa gagwe	17
5. Peu ye e tshepisišwego ya Agape	24
6. Bagateledi Bana Ba Eros.....	28
7. Masetlapelo a Modimo	35
8. Monna yo a Šegofadišwego.....	39

1. Lerato la Makgonthe

Ka thero ya gagwe ya thabeng, Jesu o ile a bolela ka dintlha tše mmalwa tše di ratago go ba bothata go batho ba banna. Eingwe ya dintlha tše e be e le gore.

Le kwele ba bogologolo ba boditšwe gwa thwe: O se ke wa otswa!
(28) Ge e le nna ke le botša ke re: Mang le mang e a lebelelago mosadi a mo kganyoga, o setše a otswitše pelong ya gagwe. Mateo 5:27-28

Go monna yomongwe le yomongwe wa moKriste, mantšu a a pyatla go loka ka moka bjo o ka naganago gore o na le bjona. Ka mantšu a, Jesu o kgoma selo se se swarelelago banna bokgobeng bja sebe. Go monna yo mongwe le yo mongwe yo a ratago go ba le pelo ya go se solege, mantšu a a modira gore awe ka dikhuru a swabile, a tseba gore o hloka Mopholose pelong ya gagwe. Go tseba Jeso ke go tseba gore ga se a lebelela motho wa mosadi a mo kganyoga. Ka tsebo ye. Le rena re na le tshepo ya gore le ge re le batho ba go belegelwa sebeng, dipelong tša rena re ka rwalelwa morago leratong la kua mathomong.

Ge re nagana ka mohla wa mathomo Adama a bona Efa, bontši bja banna re nagana gore Adama o rile IJOOO! BANNAWE!! Fela se se tliša mangwalong a magethwa megopolo ya dipelo tša go šatega. Bontši bja banna ba sitwa ke go nagana gore tšemong go be go le bjang ka letšhogo la gore tlhago ya bona e ka tšea legato. Go kwišiša lerato le le bego le le pelong ya Adama mohla a bona Efa mathomong, re swanetše go bala Bibe.

Ka lona legopo leo le a le ntšhitšego go motho, Modimo o dirile mosadi, a mo tlisa go motho. (23) Ke mo motho a boletšego a re: Bjalo gomme šo, e lego lešapo la mašapo aka, le nama ya nama ya ka. Yena yo ba tlo re ke mosadi, gobane ke yena e a ntšhitsuwego monneng. Gen 2:22-23

Hlokomela gabotse mantswa a motho ge mahlo a bona a hlakana. "Gomme šo, e lego lešapo la mašapo aka, le nama ya nama ya ka. Yena yo ba tlo re ke mosadi, gobane ke yena e a ntšhitsuwego monneng." Motheo wa lerato le la kua mathomong a se gore Adama o bone selo se se botse se a bego a rata go ka e hweletša sona. O bone motho yo mongwe yo a bego a hweditše bophelo bja gagwe go yena; o bone motho yo a tšwilego gauswi le pelo ya gagwe, gomme a mo rata bjale ka ge a ithata. Bjalo ka ge Paulo a boletše ga botse ge a re:

Gomme banna ba swanetše go rata basadi ba bona, ka mokgwa wo ba ratago mebele ya bona ka wona. Ge monna a rata mosadi wa gagwe ke gona ge a ithata. (29) Ga go motho e a kilego a hloya mmele wa gagwe; se motho a se dirago ke go o fepa le go o babalela; le Kriste o dira phuthego ka mokgwa woo. (30) Gobane re ditho tša mmele wa gagwe, re ba nama ya gagwe, re ba mašapo a gagwe. Baefeso 5:28-30

Ka mokgwa yo Adama a boletšego go Efa a re ke nama ya dinama tša gagwe le lešapo la mašapo a gagwe, ka tsela ya go swana Kriste ore go phutego, o nama ya nama yaka, le lešapo la mašapo aka. O re rata e se gore re na le se sengwe se re ka mofago sona, gomme o re rata gobane re tšwile go ena. Lerato le le ka!

Godimo ga se, ge o ka bala taba ya Genesi ya bobedi ka hlokomelo, o tla lemoga gore motho o beilwe tšhemong godimo ga tlholo ka moka, pele ga ge mosadi a tlholwa ka kgopo ya gagwe. Mohla mosadi a bopiwa, monna o ile a abelana le ena tšohle tše a bego a na le tšona. Re boeletša gape, e kaba se o se dirile a bona se sengwe se a bego a rata go se hwetša, le go se laola? E kaba o be a rata go mo reka ka thoto ya gagwe? Aowa, le a se lona lerato le le bego le le pelong ya motho go mosadi. Lerato le a bego a na le lona ke le le tšwago go Modimo, gobane Modimo ke lerato. E be ke lerato mang le? Ka leleme la se Gerike le bitšwa *Agape*, le le bolelago lerato la botho; lerato le le sa ithekgago go dilo tše di bego go moratiwa. Lentšu la se Gerike le le bolelago ka lerato la lehono ke *Eros*, gomme lerato le ga go bolelwe kalona mangwalong a magethwa. Eros ke lerato la se se botse, sa go ratega le sa go lebelega. Eros ke go hlologela go hwetša le go thabela tše di thabišago leihlo, le mmele ya rena. Bona sešupo go Baahlodi 14:2, 3 le 2 Samuele 11:2.

Mohla Efa a etla go Adama a swere sienywa, o tliile a swere se Modimo a be a sa se fa Adama gore a mofe sona. Ka sienywa se, Efa o be a swere se Adama a bego asena sona. O tšwile sehlareng mogopolo wa gagwe o tletše tsela empša ya go nagana:

Fela noga ya tšwela pele, ka lentšu la melodi, ka ditheto tša go utama tša gore o botse bjang; mantšu a gagwe a ile a mo kgahla.
Patriarchs and Prophets page 53

Sathane o boletše le Efa bjalo ka yomongwe a bego botse ka tlhago. A se a bolele le ena bjalo ka motho yo a amogetšego bohwa bja gagwe go Adama. O boletše le ena bjalo ka motho wa botse gomme se seile sa mo kgahla, sa modira

gore a lebale tlhago ya bobotse bja gagwe. Mogopolo yo o lebelelago mosadi wa nagana ka bobotse bja gagwe le se o ka se hwetšago go ena ke mogopolo o tšwago go Diabolo.

Be go na le se sengwe sa go kgahla ka Efa ge a etla go monnagwe a kolobile ka *borabele* ka maetemogelo a gagwe a maswa, go kaetshepa ga gagwe, sebetse sa gagwe be go kgahla Adama. Be go sa tlwaelega eupša go kgahla. Ka go tšea sienywa Adama a se a feleletša ka go tlola molao wa Modimo, o ile a thea molao o ileng wa dira gore barwa ba gagwe ka moka ba lebelele batho ba basadi gore ba hwetše se sengwe. Ka gare ga di pelo tša banna gwa ba le sekibo sa gore bophelo bo tšwa go mosadi, ebile o tshwere tsela ya go ya bophelong. Ka mokgwa wo borapedi bja mosadi ba thoma. Gona sešupo sa bokgoba bja monna bjo bošwa gobe go le seswantšho sa mosadi a sa apara. Se ke seswantšho se banneng ba bantši se bego lebadi la se se diragetšego tšhemong; monna o be a tlo lebelela mosadi gore a hwetše bophelo mola mosadi a be a swanetše go hwetša bophelo go monna. Ka tiragalo ye manyami ke gore lerato la monna le fetogile go tšwa go *Agape* la ya go *Eros*. Le fetogile go tšwa go lerato la go fa fela kantle ga go ba le poelo goba letseno, la ba lerato le le kgokago ke se se kgahlago fela.

Ke nnete gore lerato le le lešwa le tlisitše mosadi bokgobeng bja mohuta omongwe. Gore a kgone go fa monna wa gagwe malekere a mahlo a gagwe, gore a kgahle monna, o swanetše a sware selo se a ka mofago sona. Ka wona mokgwa wo lefase la "*fešene*" le go godiša ditho tša mmele la belegwa. Mosadi bjale o leka go hlagiša bohlokwa bja gagwe go monna ka tše a bego le tšona. Ka go hloka tsebo se o se dira a gana bohwa nja gagwe bo tšwago go monna, bjale o mo atamela a swere ditumelelano tša gagwe gomme maitemogelo a bona a mašwa a tletše bodutu le lefela go bobedi bja bona.

Hlokomela gore lerato la makgonthe le Adama a bego a na le lona ka Efa be le sa ithega ka gore o be a swere selo se se relego, Adama o be a morata gobane a tšwile go yena. Le ke lerato la *Agape*, le ke lona lerato la makgonthe.

Hlokomela gape gore tsela e nnoši ya go netefatša gore lerato ga le na bosodi ke go ba le bohlatse bja gore moratiwa o be a sa swara selo se se bego se ka baka gore lerato le tsoge. Ge wa mosadi a be a swere selo se sengwe, se se sa tšwago go monna, gona *Eros* ke lerato le le bego le tla tsoga. Ebile mosadi o tla swanela go tšwelapele a tšweletša di monamona tše di kgahlilego monna go tloga mathomong; se se iša lehung. Gopola, Adama o file lebaka la gore

gobaneng a rata mosadi – o be a le lerapo la marapo a gagwe le nama ya nama ya gagwe – le ke lona lebaka la lerato la makgonthe.

Bjalo ka ge lefa la Efa le tšwago go Adama le be le kgonthišiša gore lerato la gagwe ke la Agape, ka tsela ye e swanago lefa la Kriste le le tšwago go Tatagwe le kgonthišiša gore o rata Morwagwe ka lerato la *Agape*. Se se dirwa ke gore re bopilwe ka seswantšho sa bona. Tate o boletše a re:

Yenayo ke yena Morwamoratwa [Agapetos] wa ka, yo ke kgahlwago ke yena. Mateo 3:17

Tsela e nnoši e Modimo a ka ratago Morwagwe ka lerato la *Agape* ke ge Morwa a amogela dilo ka moka gotšwa go Tatagwe. Ye ke yona tsela ya go netefatšha gore lerato ga le na bosodi. Ge Tate a lebelela mahlong a Morwagwe, a morata gobane a na le maatlaohle, goba a na le bohlae-bjohle gona le a se lerato la *Agape* fela ke le le bitšwago *Eros*. Gomme gobane Bibe e re boditše gore Modimo o file Morwagwe dilo tšohle, se se re hlagisetšha gore lerato la gagwe ke la *Agape* le le senago bosodi, le gona le ke lona lerato a re abelago lona. Re rata ka lerato la *Agape* gobane ena a ratile Morwagwe ka lona pele.

Rena re mo rata [Agape], gobane a re ratile [Agape] pele. 1 Johane 4:19

Ge re rapela Modimo yo a ratago tša go ratega fela le rena re tlo rata ba barategago fela. Re fetoga ra swana le se re se lebelelago. Gomme ge re rapela Morwa yo a filwego dilo ka moka, yo a ekhutšago leratong le lebose la Tatagwe, le rena re ka fetolwa seswantšong se; le rena ra rata bjalo ka ge Modimo a ratile Morwagwe.

Modimo wa rena ke *Agape*, go yena ga go na *Eros* le ga nyane.

2. Ba sa tsebe dihlong

Dipalo-palo di a ipolela ge re etla go di kamano tša batho. Manyalo a ka godimo ga 50% a phetha ka tlhalo mafaseng a ma ntši. Se se tšweletša ga botse gore batho ga baaka ba hwetša se ba bego ba se lebeletše kamanong. Go ba ba ntši ba ba dulago ditlamong tša manyalo, maetemogelo a bona a swana le ba ba kgethago go tlhalana fela bona ba kgotlelela ka ge ba sa bone kgetho ya kaone goba ba na le le tšhogo la go dira di phetogo. Maphoto a manyami, kgakantšho, mahlomola, pefelo ga tee le go nolega moko, go go tšhwelelago maetemogelong a dikamano tša batho re ka a kakaretša ka putšišo eingwe ke kwelego go goleng gaka ka mengwaga ya masome seswai:

What is love anyway?

Does anybody love anybody anyway?

Kgaolong e e fetilego re lebeletše putšišo e e rego “le gona lerato ke eng?” Ka go nyakišiša gore go diragetše eng mohla Adama a bona Efa la ma thomo. Re tla gopola gore Adama o rile “šo, e lego lešapo la mašapo aka, le nama ya nama yaka,” o be a morata eseng gobane a na le se a se swerego, o be a morata gobane a tšwele mo go ena. O be a mo rata gobane a na le bokgoni bja go mo hlaloganya le ditoro tša gagwe, ga tee le maikemišetšo le tše a nyakago go di fitlhelela; godimo ga mo a be mofelegetši leetong la gagwe. Hlwekišo, le tokologo ya lerato le e akaretšwa mantšung a a latelago.

Gomme motho le mosadi wa gagwe, bobedi bja bona, ba be ba sa apara, ba sa tsebe dihlong. Genesis 2:25

Lentšu la gore dihlong ka seHeberu le na le hlaloso e e latelago:

- Go nyama
- Go sa gotsofatšega, goba se o se letetšego se sa fihlelwe.
- Go gakanega
- Go nyorwa go go bolelago go fetoga lešoka

Se Adama le Efa ba itemogetšego sona ke se le rena re se dumago, eupša re sa kgonego go se fihlelela. Tsela ya go tšwa lethabong, tokologong, mo go tletšego, go hlwekilego, ya go ya manyaming, kgakanegong le lešokeng e

ngwadilwe kgweranong ya go kga le go ja sienywa se ba sa se fiwago; kgwerano ye ibakilego gowa ga rena go tšwa go *Agape* ra wela go *Eros*.

Re hloka go hlahlobišiša taba ye bjalo ka *archaeologist* ge e nyaka leruo la kgale, e fefera lerole go hwetša dintlha tša histori tše di bolelago le rena. Lerato le Adama le Efa ba abelanago ka lona be le agilwe ka hlokomelo la godišwa ke Modimo go netefatša gore ba tla dula ba thabile, bathabelana go iša mo safelego. Tlhago ya batswadi ba rena ba pele e tshwere sephiri sa lerato le le sa tsebe go dihlontse, le le sa fihlago manyaming. Hlokomela se se latelago:

- Modimo o bopile Adama a mo bea tšhemong. Gen 2:7
- Modimo a dira Adama molete le molaki wa paradise. Gen 2:8,15
- Modimo a laya Adama ka sehlare sa bophelo le sa tsebo. Gen 2:16
- Modimo a lokiša seemo go dumelela gore Adama a lemoge ka mo o a hlokago molekane. Gen 2:20
- Modimo a robatša Adama (*ka go swantšha* lentšu laseHeberu le bolela lehu) Gen 2:21
- Modimo a tšea kgopo ya Adama a bopa mosadi ka yona. Gen 2:22
- Modimo a tliša mosadi go monna a setše a mo tsositše. Gen 2:22


Go latellana ga dintlha tše go bohlokwa gore re hlaloganye sephiri sa lerato la Makgonthe la batswadi ba rena la go se tsebe dihlontse. Efa o be a sa swara selo se a sa se fiwago ke Modimo ka Adama. Pušo le taolo ye Adama a bego a na le yona a le nnoši e beilwe fase ya bolawa, a tsoga bophelong bjo boswa a na le moswareše yo a ntšhetšwego lehlakoreng la gagwe. Ge Adama a be a robala, o be e tletše ledumo la go bula pelo, e tletše la go falala ka lerato go yo a bego a ka mo hlaloganya. Mohla a tsoga, o ile a bona yo mongwe yo a bego a ka kgona go mo tšhollela tšohle a bego a di hweditše go Modimo. Adama, a tseba tše ka moka o neile mosadi tšohle a bego le tšona. Gape o na le kgopo ya gagwe, *DNA* ya gagwe, pelo ya gagwe, legae la gagwe, tšhemo ya gagwe, le tšohle tša gagwe. Le yena mosadi o tseba gore monna o be a robaditšwe boroko bjo bo golo, a mo nea seripa sa karolo ya gagwe.¹ Wa mosadi ge a fetola, a bona tšohle tšeo a di filwego, bjalo ka ge a lebelela mahlong a monna wa gagwe, pelo ya gagwe

¹ Go robala ga Adama go goelela historing ka moka, re go bona le go robaleng ga Abrahama, mo go tšweletšego setšhaba sa Israele, le go robala ga Morwa-Modimo lebitleng go belegago phuthago ya gagwe. Tšohle di bolela ka go robala ga Tate gore a belege legohle.

ya tlaa tebogo, lethabo le nyakallo. Mosadi o phela motsotso le motsotso a tseba gore tšohle a bego le tšona o di filwe ka baka la monna wa gagwe.

Kgwerano ye ya gare ga monna le mosadi e ka sepidišwa go fihla ka go safelego, ka lerato le le sa tsebego dihlong. Sephiri le senotlelo, le motheo goba bogare le pelo bja tsepidišo ye ya lerato e eme go tsebeng le go gopoleng mo motho o tšwilego gona, le gore o tšile bjang. Ge fela Adama a be a ka gopola gore o bopilwe, a beiwa tšhemong, a ba moetapele le mmuši wa legohle gore a hlokomele, a be molaki yo a botegago wa tšohle a di filwego. Gona o be a tlo tšhollela tšohle tše godimo ga tšeo di bego ka fase ga gagwe. Bjale ka ge mosadi a amogela gotlala ga dišegofatšo go tšwa monneng wa gagwe, a lebelela go yena ka hlomphe le boikokobetšo, le go kwa ka potego, bjalo ka ge a tšwela pele go tšweletša gore o tshepa boetapele bja gagwe, bjalo ka ge a godiša hlogo ya gagwe go swana le mosadi yo a emego sedibeng aekga go tšwa pelong ya monna wa gagwe dišegofatšo le go feta tše a di hweditšego mathomong.

Re ka dira mohlala ka tshepidišo ya lerato le ka di *piston* tše pedi, goba diterapa tše pedi tša paesekele. Terapa goba piston ya pele, e bego Adama, lethabong



la gagwe la go hlakantšhwa le molekane wa nnete yo a ntšhitšwego go ena, o thoma mothopo wa dišegofatšo tše di romelago makhura *pistoneng* ya bobedi ka nako e e swanago e emeletša piston ye ya bobedi; ka wona mokgwa wo, ya bobedi e fetola ka lerato le le emeletšago piston ya mathomo, ya tlatšwa ka hlomphe, kgodišo le boikokobetšo le lethabo. Tshepidišo ye ya lerato e thoma methopo ya meetse a a tlatšago di noka tše nne tše di eelago di etšwa gare ga tšhemo, tša nošetša lefase ka moka.

Gen 2:10-14. Kgopolo ye e makatšago! Mohlala o kgahlišago wa tsela ye lefase le šomago ka yona, gobane re bopilwe ka seswantšho sa Modimo. Gen 1:27.

Gape-gape re gatelela nthla ya gore tsepidišo ye ya lerato la go ya ka go sa felego e ithegile mothong yo mongwe le yomongwe a gopole mo a tšwago gona, tlhago ya gagwe, le boemo bja gagwe tlholong ya Modimo. Ge fela Adama a gopola gore ke hlogo ya tšhemo, a gopola gore tšohle di kafase ga hlokomelo ya gagwe, le gore tšohle o di filwe ke Modimo, le gona ke tša Modimo ka moka gona o be a tlile go hlokomela le go diša se a se filwego; O be a tlo tšwela pele a tšollela di šegofatšo tša gagwe godimo ga tšohle di bego ka fase ga leihlo la gagwe. Ge fela Efa abe a ka gopola gore bophelo bja gagwe bo tšwile go Adama, le gore tšohle tše a be a di bona, ebile a le mmuši-mmogo le Adama o be a di filwe ke monna wa gagwe ka thato ya Modimo, gona o be a tlo felletša tikologo ya di šegofatšo, bo bedi ga bona be ba ka se tsebe dihlong.

3. Ka go swantšha ka rena – Sekaelo Sa Modimo

Bjale Modimo a re: A re dire motho ka go swantšha ka rena, a swane le rena... (27) Ke mo Modimo a bopilego motho, a mmopa ka go itshwantšha, a mmopa ka go swantšha ka yena Modimo; a ba bopa monna le mosadi. Genesi 1:26, 27

Ka go bala Genese ya pele le ya bobedi ka hlokomelo, re utullutše go tswalana a motho le mosadi wagwe e e be e tlo tšwelela goya go ile ka lerato la Agape. Sephiri sa motšhene yo e be e le gore motho yo mongwe le yo mongwe a gopole mo atšwilego gona, goba tlhago ya gagwe, le gore o amogeditšwe eng. Lerato la Modimo le legolo le ile la gotholelwa go motho, gotšwa mo la ya go mosadi, le boela ka ditebogo go tlhago ya mo le tšwilego gona.

Bibele e re botša gore kamano ye ya mathomo ya batho, e be e le seswantšho goba sekaelo sa Modimo le Morwagwe gobane re bopile ka seswantšho sa bona. Gona re ka e thuta eng ka sekaelo se?

Wa rena Modimo ke o tee fela, yena Tate wešo, yena **tlhago** ya tšohle le boyo bya rena bohle. Le mong wa rena ke o tee, yena Jesu Kriste **Motšweletša-tšohle** le rena. 1 Bak 8:6

Tate o tlhaloswa ka gore ke yena “tlhago ya tšohle” – mohlodi wa bophelo le di šegofatšho ka moka. Phapano gare *ga mohlodi* goba *tlhago le motšweletša tšohle* e bohlokwa gore motoro wa lerato la Agape o tšwele pele go iša neng le neng. Bjang? Ka go lemoga gore Tate ke yena tlhago le mohlodi wa tšohle, Morwa o dula a na le tebogo go Tate yo a mo filego dilo ka moka. Bjalo ka ge Ntate a lebelela Morwa e le yo mongwe a hlagilego go yena, o lakatša go mo tšhololela dišegofatšho ka moka, le go mo nea dilo ka moka, gobane ye ke yona tlhago le pelo ya Tate ya lerato la Agape – go nea le go fa. Motoro yo wa lerato o tlile go tšhwela pele o tšweletša methopo ya dišegofatšho, ge feela Tate le Morwa ba tlo dula ba tseba le go lemoga seo ba beng sona *tlhago ya tšohle* le *motšweletša* tšohle.

Tlhago le tsela ya go falala ya mothopo yo wa dišegofatšho o hlagiitšwe mantšung a a latelang

Bjale ke rata ge le tseba gore hlogo ya monna ke Kriste; mme hlogo ya mosadi ke monna; hlogo ya Kriste ke Modimo. 1 BaKor 11:3

Bjalo k age Modimo Ntate a le hlogo ya Kereste, ka wona mokgwa yo, monna ke hlogo ya mosadi. E ke ntlha e golo e re swanetšego go e hlaloganya ge gothwe ka go ke swantšha Modimo o ba bopile. Tsela e hlogo e šhumiswago ka yona e elana le mokgwa yo lefoko le le šumisitšwego ka wona tšhemong.

Gonamo Edene go be go etšwa noka ya go nosetša tšhemo yeo; gonamoo ya arogana ya ba di - **hlogo** tša dinoka tše nne. Gen 2:10

Sekaelo sa Bomodimo se hlalisa hlogo e le yona tlhago le sediba sa šegofatšo gobane Tatewešo wa magodimong ke tlhago ya di šegofatšo ka moka. Bjalo ka ge šegofatšo e fetela go Morwa, o fetoga hlogo ya monna gore a mo nee mpho ye. Monna yo a amogelang šegofatšo ye o fetoga hlogo, gore a kgone go nea mosadi wa gagwe šegofatšo. Ekabe wa mosadi o lebiša ditebogo go mang? O e lebiša go bohle ba ba bilego maborogo a go tliša šegofatšo go ena; Go Modimo, le Morwagwe le monna wa gagwe. Sephiri sa gore mokero wo wa dišegofatšo o dule o butšwe ke gore motho a tsebe gore *hlogo* ya gagwe ke mang, go tseba gore *motšweletša-tšohle* godimo ga gago ke mangy o o swanetšego go lebiša ditebogo go ena. Ka wona mokgwa wo gwa bonagala gore tshepidišo ye e ithegile gotsebeng gore phapano magare ga *motšweletša-tšohle* le *tlhago ya tšohle* ke eng.

Ge o hlodisisa ga bots emo Bibeleng o tla bona sekaelo sa bomodimo sa hlogo goba boetapela le boikokobetšo ba mmele ba hlagišwa di polekeng tše mmalwa.

Mohlodi – Tlhago	Mokero– motšweletša	Lengwalo la bohlatse
Tate	Morwa	1Bako 8:6; 1Bako 11:3; BaHeb 1:1-3
Monna	Mosadi	Gen 3:16; 1 Bakor 11:3; Baefe 5:25; 1 Pet 3:1
Tate	Mma	Eki 20:12; Baef 6:1; Bakol 3:20
Mma	Bana	1 Tim 2:15
Kriste	Monna	1 BaKor 11:3
Kriste	Phuthego	Baef 5:25
Bagolo/Baruti	Mohlape	1 Pet 5:2; 1 BaThes 5:12,13
Kgoši/Mmuši	Batho/Baagišane	BaRom 13:1-3; 1 Pet 2:13,14
Bibele	Baruti/Bagolo	2 Tim 4:2; 1 Pet 5:2

Ge mohlala wo wa Modimo o latelwa, ka wona mokgwa wo dišegofatšo di tlo wela rena le malapa a rena. Mohlala, ge re godiša tate le mma re tshepišwa bophelo bjo bo telele. Ge re godiša ruri ka lerato bao ba lego bagolo ba rena Moreneng re šegofatšwa ke dithero le dithuto le dikeletšo tša bona.

Kantle ga ditšhegofatšo tša lethabo, le boitumelo, le go ba batee bjo bo tlogo go rena ka mohlala wo wa bomodimo, go na le tšhegofatšo ya go tšhireletšega mokerong. Ka nako ka moka, yo a bego “motšweletša tšohle” o ka fase ga tšhireletšo ya mohlodi le “tlhago ya tšohle”. Mohlala wa tšhireletšo ye ngwana a ka bago le yona, re bona:

1. Ngwana a tšhireletšwa ke mmagwe,
2. Yo a tšhireleditšwego ke monnagwe,
3. Yo a tšhireleditšwego ke maphodisa,
4. A tšhireleditšwego ke mmušo,
5. Mmušo yo o beilwego ke Modimo.

Ge re nagana ka se ka semoya re bona:

1. Tate a ngwana yo a eletšwago ke baruti le bagolo,
2. Ba bego ka fase ga seatla le lentšu la Modimo
3. Lentšu le le ngwadilwego ke baporofita,
4. Le le bego Kriste, ebile le filwe ke ena,
5. Ena le amogetše gotšwa go Tatagwe.

Ge re atamela mo re hlagisago mohlala le sekaelo sa Modimo, le tšhireletšo ya rena, šegofatšo, khutšo le lethabo la rena di a ata. Tshepedišho ye re ka e swantsha ka tshepedišo e kgolo ya go nošetša legohle ka Moya wa Modimo. Lelapa le lelapa le fetoga seteišene sa relei sa go netefatšha gore dišegofatšo di tšwelapele go elela, le ditebogo tša tšwela pele go boela go Modimo. Selete, kereke le mafase ka go fapana ga ona ke di *motor* tša go netefatšha gore motho yo mongwe le yo mongwe o tlatšwa ka lerato la Tate la Agape.

Go molaleng gore Modimo le Morwagwe ba ka se itebala gore ke bona bomang. Sediba sa mothopo yo se ka se tsogile se eme. Bibe e re tshepiša

Gobane nna Morena ga ke thiše... Mal 3:6

Kriste Jesu ke wa maabane, le wa lehono, mme e tlo ba yena wa neng le neng. Heb 13:8

Tate le Morwagwe ba ka se tsoge ba fetogile. Mothopo wa bophelo yo o eelago oetšwa teroneng ya Modimo o ka se tsoge o eme. Le ge go le bjalo re a tseba gore go ile gwa ba le dikgero mokerong. Go tsebišwa sebe go bile go tsebišwa tsela ya go nagana ye e be e tlike go phekgola melao ya Sekaelo sa Modimo. Mathomo ga go tlhoka molao go go bile yena Mahlapholane goba Lucifer yo a weleng leratong la Modimo la Agape, awela goithateng ga Eros.

Mangwalo a re botša ka tsela ye Sathane a lakaditšego go fetola Sekaelo sa Modimo:

O wele bjang magodimong, wena Mahlapholane morwa a mahuba!
O digetšwe fase bjang, Mohlakiša diletelete! (13) Pelo ya gago e
be e re: Ke tlo rotogela kua legodimong, ke yo phagamiša dulo
saka sa bogoši kua godimo ga dinaledi tša Modimo, wa re ke yo
dula Thaba ya molaka, morumo wa leboa. (14) O be o re: Ke yo
dula kua go ithophilego maru, ke yo etša Yogodimodimo. Yesaya
14:1214

Di temaneng tše re bona motho yo a sa ratego go ba ka fase ga tšhireletšo le hlokomelo ya sekaelo sa Modimo. Re bona yo a ratago go swana, wa go etša Yogodimodimo. Sathane o ganana le nnete ya gore o amogeditšwe dilo ka moka a beng le tšona, o nyaka go ema boemong bjo Modimo a emego go bjona. Mathomong Sathane o be a nyaka go lekantšhwa le Morwa (yo a bego godimo ga gagwe), a sa rate go ba ka fase ga seatla sa gagwe, a nyaka go ipolelela go Tate ka sebele go sena motho magareng. Tate, ka sekaelo sa Modimo, o ile a emelela go tšhireletša le go lamolela Morwagwe, a tsebatša kamano go tswalana ga Morwagwe le tlhago ka moka. Kriste a se a ke tšhireletša goba a ke polelela, tše ka moka di dirilwe ke Tatagwe. Sathane o ile a ganetša taelo ya Tate ya go lotšha le go godiša Morwa Modimo, a lakatša go swana le Yogodimodimo.

Go bile thato ya Sathane ya gore a bonwe a le wa go swana le Yogodimodimo e e bopilego maaka a batswadi ba rena ba a boditšwego. Maaka a gore ba tla ba “bjalo ka Modimo” le gona “ba ka se hwi lehu.” Mahlapholane ena Lucifer o be a bopetšwe go ba morwadi wa seetša. Le gona Modimo o be a mo file gophala dibopiwa tšedingwe ka moka. (Hese 28:14). Bjalo ka ge Lucifer a lebeletše dilo ka moka a di filwego, o ile a lebala gore o di filwe ka nnete. Tšohle tše a beng a na le tšona o be a na le tšona ka baka la Morwa Modimo, mmopi wa gagwe yo a mmopilego ka thato ya Tate. Ge nkabe a ile a tšwela pele go

lebelela Morwa ka tebogo, a fetoge go swana le yena, yo a phelago ka goikokobetša, ka go kwa, le ka go iša ditebogo go Tatagwe, o be a ka se wele sebeng a tšwa sekaelong sa Modimo. Mudi wa sebe ke go lebala gore o mang, gona o tšwele kae, le gore tšohle o bego le tšona o di amogetše seatleng sa Morwa Modimo ka thato ya Modimo Tate.

Ge re ka gakanega ka phapano ya *tlhago* goba *mohlodi* le *motšweletša-tšohle* e beng gotswalaneng ga Tate le Morwa, gona Sekaelo sa Modimo se tlabbe se pšatlegile megopolong ya rena. Re tšwa le mokerong wa di šegofatšo. Go bohlokwa gore re gopole motheo wo.

Gomme rena ka moka ba re bogilego letago la Morena re le bona bjale ka seiponeng mahlo a tlositšwe seširo, re bopya lefsa ke yena mong wa Moya, ra tla ra swana le yena re fela re tšwelela pele go tagafaleng. 2 Bakorinte 3:18

Bjalo ka dibopiwa, ka tlhago re fetoga ra swana le se re bonago se le Modimo. Mokgwa yo re kwišišago Modimo a le ka wona re tlo lakatša go swana le yena. Sathane o ile a re tsebiša mogopolo wo o ileng wa re ruta gore re ka swana le Modimo, eseng ka semelo eupša ka maatla, ka bohlale le ka bophelo. Go tšhireletšea ga lerato la Agape go eme tsebong ya gore Morwa Modimo o amogetše dilo ka moka seatleng sa Tatagwe. Bjalo ka ge re boletše kapele, mogoplo o mongwe le o mongwe wa gore Morwa o na le dika tša gagwe tše di dirago gore Tate a morate, o thuba nnete ya gore Modimo ke lerato la Agape fela le gona ka metlha. Ge re nagana gore o tanywa kgahlego ke se sengwe se bego go yo mongwe gona Modimo ke Eros, morati wa tše botse fela, tše maatla le tše di rategago.

Ge re kwišiša Morwa Modimo bjalo ka motho yo a amogetšego dilo ka moka, le gore go be go sena selo le se se tee mo go ena se se dirilego gore Tate a modire yo a lekanago le ena, gona re ka kgonthišega gore motheo wa lerato la Agape o ka se tsoge o galogile megopolong ya rena. Go tseba tlhago le botšo bja Morwa Modimo ke sephiri sa go dula mokerong wa lerato la Agape. Bjalo ka ge Jeso a re boditše:

Jesu a re: Tsela ke nna, le therešo, le bophelo. Ga go e a tlogo go Tate ge e se ka nna. Johane 14:6

E a nago le Morwa, le bjona bophelo bjo o nabjo, e a se nago yena Morwa wa Modimo, le bophelo bjo ga a nabjo. 1 Johane 5:12

Sephiri sa gore monna le mosadi ba dule kamanong ya bona lerato la bona le fiša ka *Agape* ke gore ba tsebe ba godiše Tate bjalo ka yena *mohlodi* Modimo gomme Jeso yena Morena *Motšweletša-tšohle*. (1 Bakor 8:6) Ge re na le sekaelo se megopolong ya rena, re tlo fetolwa ra swana le seswantšho sa kamano ya bona, bjalo ka ge Modimo mathomong a rile o bopa batho a ke swantšha ka yena le Morwagwe.

Be go ka makatša go nagana gore boemong bjo, batho ba ka kgetha go phela ka tsela ye, fela se ga se kgonege kudukudu ge re kwišiša gore go wela sebeng ga motho go bile le ditla morago tše di bjang. Tshepišo ya noga go mosadi, ya gore be re tlile go swana le Modimo, ra sa hwi le go hwa e etlile le ditlamorago tša go tšhabiša.

4. Moloji le Moithuti wa gagwe

Bjale ka ge re hlodišitše lerato la makgonthe le be le le gona tšhemong ya Edene, re hweditše go motho le mosadi wa gagwe motšhene goba motoro wa go gonthišiša gore lerato le le tla dula le le gona ebile le elela baneng ba batho. Go falala ga tšhegofatšo e etšwago go Motho e eya go mosadi e be e tlile go ba makhura a bobedi ga bona, bjalo ka ge le bona ba dula ba swaretše setlogong sa bona; sa hlogo ya goetapele le mmele wa go ikokobetša fase ga hlogo eo; ba gopola ka dinako ka moka gore tšohle ba bego le tšona ba di filwe ka lerato la Agape la Modimo wa rena.

Gore tshepedišo ye e tšwetšepele go fihla leng tšhemong ga re botšwe fela manyami ke gore go ile gwa tšwelela dilo tše di dirilego gore *motoro* o emiše go duma. Re nyaka go lebelela gore go diragetše eng, re bone gore lerato la makgonthe le ile la thobega bjang la fetolwa ke lerato la Eros.

Ka lebaka le re sa le tsebego mosadi o kihwetša a eme pele ga sehlare se Modimo aitšego ba seke ba seja. Lentšu la bohlaletšwago nogeng la mo tlogela le di putšišo, la mo makatša a sala a ahlame a sa golwe mahlo a gagwe.

Yona ya bolela le mosadi ya re: A fa Modimo o boletše a re: Dihlare tšhohle tša tšhemo ye le se ke la di ja? Gen 3:1

Efa o be a tseba gore Modimo o be a file monna wa gagwe dilo ka moka, le gore le ena ke mong wa tšona ka baka la monnagwe. Putšišo ye e be e nyaka taelo e e tšwilego go Modimo e be e leka go tsentšha kgakanego mogopolong wa mosadi ka gore nnete ke efe. Mogopolo wa go botšišiša ditaelo tša Modimo o be o le yo moswa go Efa, gona motsotso le motsotso ge a tšhwela pele go theeletša noga, o be a gogelwa kgole le seemo sa gagwe tlholong ya Modimo. Teko ya gore a lamolele Modimo e be e le memo ya gore a tšwele ntle ga mokero wa dišegofatšo; putšišo e be e le memo ya gore a tšee taolo, ya mo dira gore a lebale gore o be a sa swanela go bolela le motho yomongwe atlago ka di putšišo kante ga go tšhireletšwa ke monnagwe. Ka se fela o be a swanetše go sokologa a sepele a sa bolela selo.

Re hwetša semodišo ya gore mosadi o be a sa iketla ge a fetola. Bjalo ka ge re tseba gore ge re tšhogile goba re le ka fase ga kgatelelo, gantšhi re bolela go feta tekano re nagana gore ge re dira se, re a itšhireletša.

Mosadi a botša noga a re: Dihlare tša tšhemo ye dienywa tša tšona re a di ja. (3) Fela, dienywa tša sehlare sela sa mo gare ga tšhemo, tšhona Modimo o itše: le se ke la di ja, **mme le se ke la di swara**, gore le se hwe. Gen 3:2-3

Gona Modimo o be a r' leng go motho, se a se rutilego wa mosadi?

Fela, sehlare sa go tseba botse le bobbe **sona o se ke wa se ja**; ka gobane mohla o tlogo se ja o tlo hwa lehu. Gen 2:17

Modimo o be a rile mohla le jang, le tlo hwa lehu, gomme mosadi letšhogong la gagwe a oketša ka gore ga ba swanela go se swara gore ba se hwi. Yo go bile monyetla wa botse wa gore Sathane a hlasele. Kamorago ga gore Diabolo a a fule a bee sienywa siatleng sa gagwe, o hweditše bohlatse ba gore le ge a se swere ka siatla, a se a hwe. Bohlatse bjo Sathane a beng a bohloka bo tšwele molomong wa gagwe, bohlatse a beng a bohloka ba gore Modimo o ba boditše maaka.

O ile a kitshepa go fitlha mo a lemogago kantle ga moetapele le motšhereletše wa gagwe gore Modimo o be a sa ba botša nnete. Takatšo ya gagwe ya go tšhireletša Modimo e buletše Diabolo monyako wa go dira gore mosadi a se tshepe Modimo. Bogale ba sera! Mantšu a gagwe a goka!

Efa o be a sa tsebe gore o boledišana le moya o mobe. Eseng moya o mobe fela, eupša tata meoya ye mebe ka moka! Re ka ganetša rare mosadi o be a sa tsebe gore go tšwelela eng. Eupša o be a tseba gore ga a swanela go kitshepa le go kithea yo bohlale, le gore o swanetše go tšhabela diatleng tša monna yo a amogetšego dilo ka moka go ena, monna yo a mo filwego ke Modimo gore abe thebe le motšhireletše wa gagwe go tša semoya, le dilong ka moka.

Ka go bona gore mosadi Bjale o gakantšhwa ke se se bonagalago okare ke bohlatse ba gore Modimo ga a tshepege, sera ntweng ya sona sa hlasela lerato la Agape, sa emiša lerato la Eros e le lona le le phagamego.

Ke mo noga e boditšego mosadi ya re: Le ka se ke la hwa lehu. (5) Ge e le Modimo, yena o tseba gore mohla le se jago mahlo a lena, a tlo buduloga la ba bjalo ka Modimo, la tseba botse le bobbe. Gen 3:4-5

Lentšu la gore “Le ka se ke la hwa lehu,” le swere peu ya thuto e e išago lehung ya gore maphelo a rena ga a tšwe go Modimo, re na le ona kagare ka tlhago.

Oketša go se mogopolo wa gore lefaseng go na le dilo tše dinwe tše ge motho a di hwetša di kaonafatša bophelo bja motho, le matla a bego nao. Ge mosadi a theeletša maaka a, gwa fela tebogo ka moka ye mosadi a bego le yona go monna wa gagwe ka ge a tšwile go yena, le bophelo a bo hweditše go yena. Sabobedi, ga a sa hloka go ba le tebogo mabapi le tlhago ka moka ya Modimo le gore o ifilwe ka gobane a na le “sebetse” le ka matsapa a gagwe o hweditše selo se se ka moemeletšago a fithla seemong sa gagwe sa nnete sa modimo goba kgošigadi. O be a ka se sa hlola a kikokobetša fase ga motho wa monna, gore abe fase ga “taolo ya gagwe,” ena o be a hweditše tsela eingwe ya go ya go Modimo, le gona tsela ye e be e le yena kasebele; tsela ya gona e be e le gore a phafoge a lemoge se a bego sona, a se tšweleditšwe ka mahlale a noga.

Mantšu a noga a be a na le matla go yena gobane ka nako e sa fitlhigo kae o ile a thoma go bona sesengwe mo sienyeng.

Bjale mosadi a bona sehlare seo e le se sebose ge se ka lewa, se ratega ge se lebelelwa, se kganyogega ka ge se hlalefiša; a ba a fula dienywa tša sona, a ja, a neela le monna wa gagwe e a bego a na le yena; le yena a ja. Gen 3:6

Peu ya noga e mo dirile gore a bone sehlare bjalo ka selo sa botse, bjalo ka selo sa go kgahla leihlo. O ile a kgokwa ke dika tša sehlare, gomme ka go ja sienywa sa sona o ile a kgonthišiša kgetho ya gagwe ya go amogela nnete le seemo se sempša se se bego kgahlano le se Modimo a se boletšego.

Ge go ka direga gore ga ra kwišiša se se fetšago go tšwelela, a re boeletšeng gabedi. Mosadi o be a bolela le moya o mobe. Mohla a jang sienywa, a kgetha se a se boditšwego ke moya wo, o be a o mema gore o tšee taolo o buše mogopolo le pelo ya gagwe. Ka gona, ge a e tla monneng wa gagwe o be a thopilwe ke mademona. Ka godimo ga mo, o tliile a rwele molaetša otšwago go moya o mobe, molaetša yo o beng o golofediša maatla a go dira dimakatšo le go fetola motho a swana le Modimo; se se dira bommarena moloi.

Bjale ka ge mosadi aetšwa sehlareng, o ka fase ga taolo ya Sathane. Bjale o tla go monna wa gagwe a se sa le mosadi wa go ikokobetšela monnagwe, fela bjale ka morutiši wa tumelo empša. Bjale ka ge Motho a eme pele ga mosadi, re bona seswantšho sa banna ba lefase mabakeng ka moka ba ba emago go amogela thuto go mosadi; go swana le *Delphi* le ba bangwe ba go tshepiša go tseba bokamoso ba banna ba. Bjale ka ge Motho a lebelela mosadi wa gagwe yo a bego a le lerapo la marapo a gagwe, o hlakana le moya yo o sa mo lemogego,

o sa mo godišego bjale ka mogolo le moruti wa gagwe. O be a ke hweleditše wa pelo ya gagwe omongwe, morutiši omongwe, yo a bego a mo tshepisitše ka moka tše pelo e di ratago go sa hlokege gore a ikokobetše go motho. Bjale o tlile, ga a tlela go rutwa eupša o tlile go ruta. Ga a tlela go ikokobetša, o tlile go laya gore a kgothamelwe. Moya wo wasesadi Bjale gona o be o buswa ke memoya ya lešwišwi, gomme Bjale ke sekotlelo sa go goketša Motho gore a fetoge moithuti wa ona.

Ga se moya wa tebogo yo Adama a o hweditšego go mosadi wa gagwe, fela gobe go le moya o mongwe, wa go hloka boiketlo, wa go fofela godimo, moya wa go taga, le go timetša. Bjale ka ge a mo lebelela, o thoma go mo romela maswayo le ka mahlo le melaetša ya gore o a mo gahla; mafellong o šomiša mmele wa gagwe bjale ka lerumo la go bolaya Adama le go mo tliša bokgobeng ba sebopiwa se se swa a bego sona. Adama o kwa noga e lela go moloi yo a e tirago mosadi wa gagwe, a sa tsebe gore ka nnete le ke le *vampire* le le nyakago go kifepa ka yena, le mo fetole modimo Nemirode. Be go kaba botse gore Adama a gopole gore:

Gobane tayo ke lebone, thuto ke seetša; tsholo le keletšo ke tsela ya bophelo. (24) Di tlo go efoša mosadi e mobe, le leme la boreledi la mosadi o šele. (25) Pelo ya gago a e se kganyoge bobotse bja gagwe, a se tlo go tanya ka ditebalebo. (26) Mosadi wa seotswa o diitša motho a mo fetola bogobe; ge e le mosadi yo o hlakola motho bophelo, lona lehumohumo. Diema 6:23-26

Adama a lwantšhana le noga e tlilego go ena ka sebopego sa moloi yo. Ka yena, Sathane o leka go šomiša maatla le mahlale a gagwe go kgoka motho borapeding bjo boswa. Ka seatla sa gagwe o tshepiša bophelo eupša Adama pelong ya gagwe o tseba gore se ke lona lehu.

E tlo ba go go thibela go ya go mosadi e sego wa gago, le go e a sa **tsebjego**, wa mantšu a boreledi; (17) o hladile moratwa wa gagwe wa mola a sa le kgarebe, a lahla kgwerano ye a e dirilego ka Modimo. (18) Lapa la gagwe le tlo sobelela lehung; mme tsela tša gagwe di iša bahung. Diema 2:16-18

Adama a se a lemoge gore mosadi wa gagwe o setše a hwile; mosadi wa botse wa go kwa, wa go ikokobetšela monna wa gagwe, pelong ya gagwe go tletšego tebogo go Modimo ka monna wa gagwe, o hwetše pele ga sehlare sa tsebo. Bjalo ka morwa wa mosadi yo, kea lla ke bohloko ka lehu la gagwe, bomma


baka ba we! Ba bolailwe sehlaeng sa tsebo batšielwa boemo ke moya o mo šoro bjalo ka dihele. Ka godimo ga mo, moya wa bose wa go ikokobetša wo o be o dutše pelong ya mosadi be o le Moya wa Kriste ebile ka go ja sienywa se, o bapotše Kriste sefapanong, gomme ka wona mogwa yo a napa a bile kwana ye e hlabilwego lefase le se šo la thewa.

Ekaba Adama o ile a kholofela gore ka go ja sienywa a ka tsena lefaseng le le lefša la leswiswi a kgona go pholosa mogatšagwe? Ekabe le ena o ile a ki pona a tšhireletšegile go hlabana le Diabolo ntweng aba a mo fenywa? Ge ke nagana ka tatewešo Adama le bohloko bjo a ilego a hlakana le bona, ke mokwela bohloko, ke lakatša go goelela “auwa tate kea gopela! O se ke wa kgetha bosenyi kgahlano le Tate wešo o Lerato!” Fela maswabi ke gore ga ke kgone go fihlelela ditsebe tša gagwe. Oa tšea o a ja.

“*New world order*” e ile ya thewa; Adama a fetoga lekgoba la mosadi. Gomme yena o be a tlo fetoga morutiši, Adama a fetoge moithuti. Bjale be go na le seripa sa monna se se lebelelago mosadi go hwetša bophelo, se sengwe gape bjale o ikemišetša go se laolwe le go se bušwe ke yena. Bobedi ga bona bjale be ba hlakane ntweng ya bong, bobedi ga bona ba baka tokelo ya go kikgotsofatša le go laola. Bjale ka ge re dumela gore bong bjo bongwe bo na le maatla a a rileng, bophelo bo fetoga ntwaga goba hlabano ya go hwetša le go laola tšeo re di ratago.

Tshekego le bohlweki bja motšhene wa lerato la makgonthe le o le tšhololelago dišegofatšo go tšwa hlogong, le ditebogo tše di tšwago go yo a ikokobetšago fase ga hlogo eo o fetolwa ke papadi ya go tanywa kgahlego le go selekišana. Le e be e le lefase le leswa mo tša go ganetšana di hlakanago gona. Borapedi bjo bo boswa bo ruta gore motho yo mongwe le yomongwe o na le gosa-hwi, le gore re kgona go eketša maatla a re bego le ona ka go kihlakantšha le motho yomongwe wa go ba le go-sa-hwi. Sephiri sa mofuta yo wa lerato le leswa ke gore o hwetše molekane yo a tlliego go godiša eupša wa sa ba dumelele gore ba go laole goba ba go buse. Maitemogelo a banna le basadi a ma swa ke a go goketšana le go hlalefetšana le go laolana; tsela ya go hlagiša mmele wa gago eupša o fihla moya le maikutlo a gago. Maitemogelo a bose a lerato a a tlišitšego go dukuluga ga ditebogo le hlomphe a tlošwa ke maitemogelo a matala a go ya pele le morago a go ratana le go šišimišana le go tenana; bobose ba seripanyana bjo bo reng ge bo fela gwa sala go tenega le gokwa motho a se

selo.² Go dula o nyaka fela o sa gotsofale. Tshepidišo yempša ya banna le basadi ga se ya tikologo ya lerato le le tlileng go phatlalatša Moya wa Kriste lefaseng ka moka. E be e swana le *sakshene* ya *magnete* ye e jago tšohle dibeng tseleng ya yona. Bohlale bja motšhene wa Agape ke gore bobedi ga batho ba lerato le le bego gare ga bona ba tseba gore tšohle tše ba beng natšo ba di filwe. Le gore gobane Modimo ke Agape o tlo ba nea ka moka tše ba di hlokago. Ka le hlakoreng le lengwe, motšhene wa *Eros* wona, motho o dula a nyaka gore a ki hweletše ka gona motho yo a ka se tsogile a kgotsofetše.



Go ka makatša go nagana gore Mosadi (Efa) o be a le moloi yo a nametšwego ke ma dimona. Bjale ka ge Adama a be a lebelela, a nagana gore motho wa botse go swana le ena go ka se direge gore atle ka lehu. Batho babantši lehono ba bona se se dirilwego ke mosadi e le selo se senyane kudu. Gona ke nnete o be a forilwe, le gona o be a sa kwišiši se be se tšwelela go ena, eupša se se dirile gore lenaba le mo šomiše ka bo hwari go wesa Adama. E kaba se se bolela gore banna ba swanetše go rwesa basadi molato wa go wela sebeng? Aowa, sephetho sa bana ba batho be se le matsogong a monna, gomme go kgetha ga gagwe go bile le ditlamorago tše digolo kudu bjale ka moetapele wa batho.

² Mohlala wa se bona 2 Sam 13:10-15. Amon okatile ngwanabo are go fetša a mohloya.

Boetapele goba go ba hlogo go ra gore Adama o be a tlo rweswa molato wa go wela sebeng ga bana ba batho. Gomme, gore re kwišiše tše ka moka re swanetše go kwišiša gore gona go diregile eng mathomo se se bakilego gore batho bawe Leratong lela la makgonthe.

Bibele e bolela gore: Monna wa pelopedi, ditseleng tša gagwe ka moka ga a loke. Monna o pelo-pedi ka gore o kipona a le morena le lekgoba la mosadi. O lebelela go ena go amogetšwa dimona-mona, a kholofela gore o tla mofa se a se hlokago, ka nako e e swanago o rata go mmuša le go mo laola. Kgakanego ye ga e mo thuše gore a boele morerong wa Modimo wa Agape e e tlileng go mofa ledumo goba takatšo ya go šegofatša mosadi wa gagwe, a kholofele gore yena o tlo mo hlompha a godiša le boetapele bja gagwe. Bjale ka moperisti-gadi wa tumelo empša, mosadi o be a na le ledumo la go tlisa monna morago ga serethe sa gagwe bjale ka lesole la gagwe, ka nako e e swanago a akamatšwe ke maatla le seemo sa gagwe sa mogale.

Re ka se bolela gwa kwagala gore batho ba babedi ba go nyaka go bušana le go laonala ba beeletše ba gotsofatšane mafellong ba išana lehung. Metheo ya go gotsofala le go laolana ga e kgone go ya go-safelego gobane e ya fedišana. Kantle ga go tsebišwa peu empša, ka baka la motšhene wa Eros wa go kgokana ga bobedi le go šišimisana, maitemogelo a batho be a tlile go felela tšhemong. Le ge Moya wa Kriste o ile wa rakwa tšhemong ge batho ba wela sebeng, tshepišo ya lehu la gagwe a le peu ya mosadi e butše monyako gore mašaledi a bana ba Adama ba amogelwe mmušong wa Agape.

5. Peu ye e tshepisitšwego ya Agape

Ke nagana gore gwa makatša go khuduga ga di nonyana tša go swana le maganse a *Canada* a a fofago go tšwa sedikong sa *Arctic* go ya Borwa ga Amerika a tšhabela marega a šoro a setlhakatlhakeng. Tatewešo o beile gare ga leganse boikutlo bja go tlhahla dimitara tše magolo a dikete ka nepo e e makatšago go dumelela gore mofuta yo o phologe. Nagana ge nkabe a hloka tsebo goba bokgoni bjo, le ge be di ka timetšwa tša leba Phoulong ya leboa? Nagana fela gore be a ka fedišwa bjang. Ka nakwana e khutswane fela thari ka moka ya maganse e be e tlo poumulwa lefaseng.

Manyami ke gore, se se bonagatša se se tšweletšego ka bana ba batho mohla batswadi ba rena ba mathomo ba amogela maaka a noga, ba thoma go tshepa le go dumela gore bophelo ba beng le bona ke bja bona ka tlhago. Go na le gore dipelo tša bona di sokologe go Modimo ka ditebogo le lerato ka tlhago, ba ile ba gola ledumo la go rotogela kua legodimong, morumo wa leboa, ba etše Yogodimodimo. (Bona Jesaya 14:12-14) Maaka a gore ba tlo swana le Modimo a ile a fetola tsebo ya *darekshene* ya bona ka moka, ya dira gore batho ba dume go rotogela leboa gona le gore ba fofele borwa mo go bego le polokelo ya bona.

Piston goba motšhene wa botse wa *Agape* o bile fase ga maatla a maswa, ya se saba sediba sa go tšhweletša botho, bopelotelele, le ditebogo ya fetoga tsela ya kelatšhila ya go ngaa ya go gothola go jelathoko, go busa le go laola babangwe, maaka, bofora le lehloyo gore go gotsofatšwe nna.

Peu ya lehu e be e bjadilwe mogopolong wa Efa, ka morago ga fa o ile a šomišwa ke Diabolo go bjala peu eo mogopolong wa Adama. Gomme peu ye e rile go mela mudu mogopolong wa gagwe, motheo wa motšhene wa *Agape* o ile wa fedišwa, gona molao wa lefa goba bohwa yo o be o beetšwe go tšweletša motšhene wa *Agape* megopolong ya bana ba Adama Bjale e be e tlile go amogela motheo wa motšhene wa *Eros*, ye e be e baka gore pelo e rotogele leboa, e lakatše go ba bjala ka medimo mola nkabe e fofela borwa ka boikokobetšo ba lotšha Modimo wa therešo, yo bophelo le dišegofatšo di tšwago gona.

Peu ye e be e swere ya gola mudu botebeng bja megopolo ya batho. Be go sa kgonege gore Modimo a robatšhe Adama a e kumule. Bothata e be e

se ba nama, e be e le ba semoya. Tsela e be e le ye tee fela ya gore Modimo a fitlhelele peu ye a e fediše. Be go na le tsela e tee fela ya gore Modimo a fitlhelele mogopolo wa Adama, a busetše motšhene wa *Agape*. Re bala ka morero yo go Genesis 3:15, 16. Modimo a boletše le Sathane a re:

Le gona ke bea lehloyo gare ga gago le mosadi, le gare ga peu ya gago le peu ya gagwe. Yona e tlo go pšhatla hlogo; mme wena o tlo e loma serethe. (16) Mosadi, Modimo o boletše le yena a re: Ke tlo go atšetša kudu tapišego go imeng ga gago; o tlo belega bana ka bohloko, mme o tlo fela o hlologelwa monna wa gago; mme yena o tlo go buša. Gen 3:15-16

Morero yo be o na le go iša kotsing. Ngwana be a tla bolegwa, setlogolo sa Adam le Efa, a hlabane le Diabolo ntweng, a fediše peu ya lehu ya *Eros* ye e beng e utame botebeng bja pelo ya bana ba batho. Diabolo o be a tla mo loma serethe tlhabanong ye. Eupša yena a pšhatla hlogo ya noga, gomme mafelelong go phulege tsela ya gore bana ba batho ba tšhabe. Tshepišo goba kholofedišo ya peu ye e fetisitšwe go moloko yo mongwe go ya go yomongwe e boeletšwa. Aborahama a tshepišwa gore peu ye e be e tlile go hlaga ntlong ya gagwe. Le Gona malapa ka moka a lefase a tlo šegofatšwa ka ena. (Gen 12:13). Paulo ge a bolela ka kholofedišo ye, Testamenteng e mpšha, o re:

Tše Aborahama a di boditšwego e le kholofedišo, di lebane ena le peu ya gagwe. Ga go thwe: Dipeu, eke ke tše ntši. Go bolelwa peu e tee, ge go thwe: Ka peu ya gago. Mme yona peu yeo ke Kriste. BaGal 3:16

Peu ye e beng e letilwe be e le Kriste. O be a tlile go tla aetšwa legodimong ka motšhene goba mogopolo wa gagwe wa *Agape*, a belegelwa baneng ba batho ba go ba le mogopolo wa *Eros*. Tlhabano e be e tlo ba ye šoro bjalo ka ge peu ya noga e leka go bolaya peu ya mosadi, e sa mo dumelele gore a pšhatle mogopolo wa *Eros* go motho. Tlhabano ye e be e le e kgolo gore Kriste a atamela sebo le moko wa mmušo wa *Eros* pelong ya motho, o ile a goelela mantšu a go Tatagwe:

... Tata, ge go kgonega, a senwelo se se fete se ntloge. Fela, e se be ka mo go ratago nna, e be ka mo go ratago wena. Mateo 26:39

Moporofeta Jesaya ge a bolela ka tlabano e e satla, o rile ge a bolela ka yena:

Boka mola go tšhoga ba bantši ge ba bona fahlego sa gago se senyegile, se se sa etša sa motho, o se sa swana le ngwana wa motho. Jesaya 52:14 (NKJV)

Ntweng ye ya mogopolo kgahlano le Sathane, Morwa Modimo o be a tlo hwetša tokelo ya go tsena a hlabane a le yo mongwe wa leloko la bana ba batho. O be a tlo tšea godimo ga gagwe tlhago ye e bego le peu ya lehu, go direla gore a e pšhatle a e fediše. Ka motheo wa lerato la *Agape*, Morwa Modimo o be a tlo bula tsela mogopolong wa batho ye e tlo re thošago gore re hloye peu ya lehu. Bjale ka ge be re tseba gore Kriste o tlile go tla a le wa leloko la Adama, Modimo o ile a kgona go bea lehloyo la peu ya Diabolo pelong tša Adama le Efa.

Mola Kriste a tlile, a re eta pele tseleng e sesane ka bophelo bja go ganetša mogopolo wa *Eros* nako ka moka, o rile go fetša a iša peu eo lehung a e fediša.

E a feditšego lebakanyana a hlaeditšwe a se lekane le Morongwa, ke Jeso yo re mmonago a hlamilwe ke borena le letago ka tsela ya go tlaišwa le ya go hwa; gore ka kgaugelo ya Modimo a kwe lehu ka baka la bohle. BaHeb 2:9

Bjalo ka go itira selo se tee le bana bao, ka go ba nama e tee le madi a tee le bona, o fentše Diabolo e a bego a na le maatla a lehu... BaHeb 2:14

Kamorago ga go fediša peu ya noga, Kriste o re nea kholofelo tseleng ye sesame ye a re etilego yona pele. Ge re ka sepela magatong a gagwe le rena re ka kgona go ganetšana le peu yela ya lehu ka ge re hwetša peu ya gagwe ka tumelo go yena bjale ka ge a le Adama wa bobedi. (1 BaKor 15:45). Sediba sa bohlokwa sa lerato la *Agape* se ile sa elela gape dipelong tša banna le basadi. Morero wa go makatša ka nnete, le lerato la Modimo la go makatša gore a neele ka Morwagwe morerong wa kotsi ka mokgwa wo, gore rena re hwetše monyetla wa go phela mokerong wa *Agape* wo o elelago o etšwa sedulong sa bogoši sa Modimo.

Ge re boela go Genesi 3:15 re bona gore Modimo o tšweleditše gore mahloko a mosadi a tlile go ata ge a belega bana. Se e be e le sešupo sa gore tlabano gare ga dipeu tše tšepedi e tlo tliša mahloko. Mogopolo wa *Eros* wa Adama o be o tlo fetela baneng ba gagwe, gomme bohloko bjo mosadi a bokwago bo tlo

utulla ntwaga magare ga peu ya mosadi le peu ya noga. Ngwana yomongwe le yomongwe o be a tlo amogela seetša se se tšwago go Kriste, se se ba fago lehloyo la peu ya noga. Le ge go le bjalo, megopolong ya bona ba tlile go thoma ba dumelelana ebile ba rata peu ya noga, gomme noga e be e tlo leka go pšhatla peu empšya ya gotšwa go Kriste. Go belegwa ga ngwana yomongwe le yomongwe ke segopotšo sa tlabano ya Kriste gore a fenye peu ya noga, le ntwaga ya gore motho a belegwe lefšha mmušong wa lesedi. Kagona ge go belegwa ngwana yo mongwe le yomongwe re bona nnete ya gore:

Tše nama e di dumago, di loša Moya; gomme tše Moya o di dumago, di loša nama. Dilo tše di a ganana; di le šitiša go dira se le se ratago. BaGal 5:17

Seripa sa mafelelo sa Genesi 3:16 se re bontšha gore peu ya mosadi e tlo tlhola. Karabelo go se ka tlhago ga se ya go dumelelana, fela le ge go le bjalo karabelo ye ke ditlamorago tša mogopolo wa *Eros* wo re o hweditšego e le bohwa bja rena.

“mme o tlo fela o hlologelwa monna wa gago;

mme yena o tlo go buša”

Go moloi, go barwedi ba gagwe le baithuti ba gagwe ba go hloka thošo, mantšu a a bolela ka ntwaga e e swanetšego go emišwa ka ditsela ka moka. Eupša go ba ba sepelago tsela e sesame, ye e beilwego ke Kriste, mantšu a ke kholofedišo ya botse ya go boeletšwa ga mogopolo wa *Agape* ditswalanong tša banna le basadi. Ledumo goba go hlologela ga monna ke go tšosololwa ga lerato la *Agape* la go lemoga gore dilo ka moka o di amogetše a di fiwa ke yena. Boetapele bja monna ke segopotšo sa gore mosadi o hlagile a tšwelela go monna le gore o swanetše go ratwa le go hlokomelwa ke yena. Go hlologela le go eatapele ke dintlha tšepedi tša go fitiša kholofedišo ya *Agape*, e re bosetša seswantšhong sa sediba sa bose se se elelago se etšwa sedulong sa bogoši sa Modimo. Go hlologela go go tšwago pelong ya mosadi ke Moya wa Kriste ka sebele, Kriste yo a hlologelwago Tatagwe bjalo ka ge e le yena a mo neilego dilo ka moka. Go hlologelwa go lokišiša “*navigation system*” ye e re dumelelago gore re rotogele borwa ka ditebogo maotong a yo a re fago bophelo, ra mo dumelela gore yena a le noši a buše gotšwa leboa. Genesi 3:16 e re nea kholofedišo ya go lokišišwa ga sekaelo sa Modimo.

6. Bagateledi Bana Ba Eros

Sathane a se a senye nako ka go leka go fenya peu e e kholofeditšwego ka go šomiša mogopolo wa *Eros*, a tšweletša maphoto a sehlogo le tshenyego.

Bjale Morena a bona bokgopo bja batho bo godile mo lefaseng, le tiro ka moka tša diakanyo tša dipelo tša bona e le bobbe fela ka mehla. Gen 6:5

A re boeleng morago ganyane go bona gore mogopolo wa *Eros* o bego o phothetšwe mantšung a noga o be o kgona go phomola lefase ka moka ka meetsi bjang.

Re tla gopola gore mohla Efa aetla go Adama a tlaletšwe ke Diabolo a swere sienywa se ba sa se dumelelago go se ja, o tllile a le morongwa. Sathane o be a rata go kgokela Adama mmušong wa gagwe wa *Eros* a šomiša Efa. O nyakile go mo gogele lehlakoreng la gagwe, a mo dire moithuti wa gagwe. Bjale ka ge a be a tsene mmušong o moswa, Efa o be a lebelela Adama bjalo ka motho yo a bego le maatla, yo a ka mo thušago, a eme lehlakoreng la gagwe kgahlano le se ba beng ba ka hlakana le sona. O leka go mo kgoka ka bobotse bja gagwe, seatleng a swere sienywa sa lehu bjale ka leruo le le mo swanetšego. Sienywa se be se swere kholofedišo ya lefase le leswa mo a bego mmušo wa legohle la gagwe. Bjale ka morongwa, Efa a fetoga monyako wa go tsena lefaseng le le leswa. Gothaba ga mathomong go go tlisitšwego ke sienywa go hlakane le bohlagahlaga ba go sepela mo go sešo gwa sepelwa go phethile ka lefela, le ditebelelo tšeo di sa phethagatšwago. Se ke lefela le dihlong tše be ba sa ditsebe mathomong. Go nyama ga Adama le Efa o go kwelwe, le yena wa nyama gobane monnagwe a se a gotsofale, ebile o hloka tebogo, o bonagala a tenegile, a selekišega, a fedile moya, a ipea kgole.

Hlokomela gore kholofedišo ye e felelago manyaming e boeletšwa ke banna le basadi go fihla lehono. Monyako wa mosadi a sa aparago o tshepiša monna lethabo le lefase la ditoro tša gagwe.³ Ledumo le la go hwetša motho wa mosadi a go thabiše ke leswayo la tlhago la ledumo la Adama la go hwetša le go ki thabiša ka sienywa sa sehla sa tsebo. Gopola gore maaka a noga a re tshepisiše bophelo le maatla, bjale Adama o bona Efa a le tsela ya go hwetša

³ Nnete e ebile e fetotšwe monyanya ditumelong tše dintši tša bohedene, ya phatlalatšwa ke dipuku tša dinonwane tša go swana le The Da Vinci Code.

maatla a gagwe, a hwetše bomodimo bja gagwe. Mola mathomong a be a mmona bjale ka yo a tšwilego go yena. Gore monna a kgoke goba a gahle mosadi, o bonagatša maatla a gagwe. Ye ke tsela ya go kgokana le go gahlana ga babedi. Go molaleng gore mosadi a ka se fe Adama maitemogelo a go ba modimo. Maikwelo a sebakanyana a fela, Adama a šala a sa gotsofala le go sa hwi a sena. Go banna ba bantši se se fetoga tikologo e bohloko. Botebeng bja mogopolo ya gagwe, seswantšho sa mosadi yo a sa aparago se mo kholofediša bophelo, legodimo le go swana le Modimo eupša sephetho sa gopalelwa go phethagatša ditlamorago tša nako e telele go bakela maikwelo a go se be selo, le go tenega. Moya wa fetoga, monna a fetoga wa go dula a nyaka, a letetše gore mosadi a mothabiše a mo tlišetše maitemogelo a nyakago, a tlileng go dula a le gona nako e telele. Go palelwa ga mosadi gore a thabiše monna wa gagwe go dira gore awe ka go fela pelo goba a fetole ka go galefa le go tenega go monna yo a dulago a mo nyakile⁴, yo a ratago thobalano. Ka wona mokgwa yo go selekišega le go tenana ga batho ba babedi ke sephetho sa tikologo ye. Bontšhi bja dintwa tša phaphušing ya go robala botšo bja tšona ke sienywa sa tšhemong, le tshepišo ya legodimo ga seswantšho sa mosadi a sa aparago.

Ye ke tikologo ya *Eros*

1. Go kgahlana le go tanya kgahlego
2. Go letela
3. Go hwetša
4. Go nyama
5. Go selekišega

Mokong wa mogopolo wa *Eros* ke tumelo ya gore go hwetša se se bonagalago se le sa botse, se ratega ebile se hlabosa gona re tla hwetša se re se hloka. Se a se kgonege gobane taba ya lerato la makgonthe e hlagišetša gore ga ra bopiwa ka tsela ye, le gona ga re na selo ka gare ga rena se se ka gotsofatšago motho ka tsela ye.

Re bona ditlamorago tša tikologo ye ya *Eros* di golela gotšwa sehlareng go fihla go tswalaneng ga banna le basadi.

⁴ In Hebrew Tamid (Strong's H8548) See Isa 52:5 "my name continually every day is blasphemed."

Barwa ba Modimo ba bona barwedi ba batho e le bona ba babotse, ba tšea basadi mo go bona ba babotse, ba tšea basadi mo go bona bao bohle ba ba bego ba ba kgahla. Gen 6:2

Ge o lebelela temana ye e latelago o tla lemoga selo sa go swana le se se tšweletšego go Efa le sienywa.

Tsela ya Eros	Genesi 3:6-10 Tlago ya Eros	Genesi 6:2-5 Lefa la Eros le bonagala dikamanong tša manyalo
1. Go tanya kgahlego (Vidi)	Bjale mosadi a bona (H7200) ⁵	Barwa ba Modimo ba bona (H7200)
2. Go letela (Veni)	Sehlare seo e le se se bose (H2896) ge se ka lewa	Barwedi ba batho e le bona ba babotse (H2896)
3. Go hwetša (Vici) ⁶	A fula (H3947) dienywa tša sona, a ja.	Ba tšea (H3947) basadi mo go bona bao ba bego ba ba kgahla.
4. Go nyama	(7) ...Ba lemoga ge ba sa apara.	(4) Mehleng yeo mo lefaseng go be go na le ditsitsiripa ⁷
5. Go Selekišega	(8) Adama le mosadi wa gagwe ba utama (10) ...the woman whom thou gavest me	(5) Bokgopo bja batho bo godile mo lefaseng, le tiro ka moka tša diakanyo tša dipelo tša bona e le bobbe fela ka mehla.

Go latelana ga mantšu a go re *bona*, *bose* le go *fula* go Genesi 3:6 go swana le a a bego go Genesi 6:2 a a reng *bona*, *botse* le *tšea*. Go bona selo sa botse wa ki tšeela sona ke mudu wa motheo wa *Eros*. Barwa ba Modimo ba arošwa go swana le bommabona pele ga sehlare sa tsebo. Ba bona mosadi a le wa bose ge a ka lewa gomme ba ke fulela ba ja. Nako le nako ge monna a kganyogela

⁵Dinomoro di bego gare ga dibraket di tšwa go Concordance ya Strongs

⁶ Go fetolwa ga go ke theta ga Julius Caesar yo a rilego “ke tliile, ka bona, ka fenyā” <http://en.wikipedia.org/wiki/Veni,vidi,vici>. Efa ena o bone sienywa, ka go letela a tla pele go se fula.

⁷ Go belegwa ga bagale go bontša diphapano le dintwa manyalong.

mosadi, o tloga a eme pele ga sehlaire a amogela sienywa go tšwa go noga. Nako le nako ge monna a kganyogela mosadi o arošwa ke maaka a gore mosadi o na le se a se swerego, se se ka kaonafatšang boemo bja gagwe lefaseng.

Go swanetše go ba molaleng gore basadi ba *babotse* be ba sa dula magaeng a bona, ba tshepa Morena gore o tla ba tšea a “ba tliše banneng ba bona.” Be ba godiša *dikhefe* ka moka tše be ba kgona go ka di godiša, tše be di ka dira gore banna ba ba tšee. Nako le nako ge motho wa mosadi a ke tebelela seiponeng a ke potšiša gore “a nka sokološa dihlogo, ke a bonagala ge ke apere seaparo se?” O tloga a eme sehlaireng a amogela sienywa go tšwa go noga. Nako le nako ge mosadi a aparela gore a bonwe ke banna, sephetho ke gore o tla latswa sienywa sa go baba sa *Eros*.

Moraloko yo wa go segišana ga banna le basadi mo ba lebelelanago ka leihlo la go amogela sengwe go yo mongwe o tšweletša tikologo ya tlhago ya *Eros* ya go kgahlana, go ba lefela le go selekišega.

Maikwelo a a bang gona magare ga monna le mosadi a fetoga peu ya leloko le le latelago. Go na le gore le gole le tseba gore tšohle tše le bego le tšona di tšwa batswading ba lona, le gore le godiše batswadi di ba thabiše, leloko le gola le tsomana le dijo tša mahlo, le go di tšea le go boeletša tikologo ya go nyaka go hwetša legodimo ka monyako yo o bego mosadi. Bibe e bolela se sengwe sa bohlokwa ka bana ba go belegwa manyalong a:

Mehlang yeo mo lefaseng go be go na le ba ditsitsiripa, ba ba gona le mehlang ya morago; ka gobane barwa ba Modimo ba be ba tsena go barwedi ba batho, ba ba belegela bana. Bona bao ke **bagale** bale ba bogologolo, banna, ba maina a a tumilego. Gen 6:4

Lentšu la gore *bagale*, le bolela ka bagateledi ba maatla, mašole. Bana ba batho ba go kgetha basadi ka mokgwa wo ba bonagalago ka gona ba ile ba boeletša papatšo ya kua tšhemong. Dikamano tša bona tša thewa ke lerato la *Eros*; go nyaka se se kgahlago mahlo le pelo. Kamorago ga meloko emmalwa fela motheo wo o fetotše lefase lefelo la bogwagwa le bošoro. Le tiro ka moka tša diakanyo tša dipelo tša bona e le bobele fela ka mehla.

Le ge Moya wa bose wa Kriste o be o le gona, barwa ba Modimo ba ki kgethetše tsela eingwe. Ge ba kgetha mosadi *gobane* o botse, be ba utulla gore dipelo tša bona di tletše *Eros*, eseng *Agape*. Gwa bonagala gore Moya wa Kriste o ganetšwe. Banna ba be ba sa re “Yo ke lešapo la mašapo aka le nama ya di nama

tša ka.” Eupša bare IYOOO NNNA WEEE! Ge basadi ba kitira ba botse, ba kipenta gore ba kgahle banna, le bona be ba kgetha *Eros*, ba sa kgethe *Agape*. Le bona ba ganeditše Moya we Kriste. Kamano efe goba efe e e theilwego mothewong wo i ka se fitlhi kgole. Sephetho ke dienywa tša go se be bose.

Bjale ge ke tsene lenyalong ka tsela ye, ke dumela gore ke tsene lenyalong ke lebeletše sebopego sa mmele? Lebelela Morwa Modimo, o bone gore o ratwa ke Tatagwe gobane a tšwile lehlakoreng la Modimo. (Johane 17:8) Bjale ka ge re mo lebelela *ka mo a bego ka wona*, re tlo fetolwa seswantšhong sa gagwe ra ithuta go rata ka lerato la *Agape*. Go bontši bja rena, re phetše mengwaga emintši ka megopolo ya go šhatega, re lebeletše gore re ka amogela dilo go tšwa go balekaneng ba rena. Tsela ye ya go nagana e ka se fetoge ka ponyo ya leihlo. Eupša sephiri sa go fetoga ke gore motho a tsebe gore Morwa Modimo ke mang. Ke yena leswika la motheo la *Agape* gobane o filwe dilo ka moka. Tšatši le letšatši ge re nagana ka yena, re bona Moya wa gagwe wa bose, wa go ikokobetša, wa go dula a khuditše a hlokomelwa ke Tatagwe, re tlo fetoga ra swana le yena. Gomme ge re tšwela pele re mo lebelela, re tšwelapele ra nyaka go swana le yena, ra rapela gore Moya wa gagwe o buše dipelo tša rena. Bjale ka ge re lemoga bogolo bja moneelo a beng a ikemišitše go o dira gore a refe Moya wa gagwe wa *Agape* re tlo tlala tebogo. Gona ge re lemoga gore Tate o be a ikemišitše go neela ka yena go re topolla, dipelo tša rena di tlo thoma go ba le maetemogelo a nnete ya lerato la *Agape*. 1 Johane 4:8-10.

Bjale ge ke le mo kamanong e e thomilego ka tsela ye eupša ke sešo ka nyala? Se re tla bolela ka sona ka botlalo dikgaolong tša pele, eupša karabo ka a mabedi ke gore motho a lebelele Morwa Modimo, o sokologe mogopolong wa go rata go ke tšeala. Go iša lefeleng, manyaming le bošorong bjo bo ka tšwelelang.

Ka sebaka se babangwe ba ka nagana gore, “Ekabe o re batho ga ba swanela go thabela le go ke thabiša ka thobalano?” Go molaleng gore Modimo mpho ya thobalano o e file batho gore ba ke thabiše ka yona ka nako ye e swanetšego. Se re bolelago ka sona ke gore go kithabiša go go tlhotlhoetšwa ke eng, le gore sešupo sa thobalano ke eng dipelong tša banna le basadi. Se re se tšweletšago mo ke gore maitemogelo a thobalano a a kithegilego go gotsotfatšeng medumo ya motho sephetho sa wona ke bogalaki moyeng.

Peu ya *Eros* ye e byadilwego dipelong tša banna le basadi ga ya felela dikamanong tša bona; go fetogile tlhago ya bona dilong ka moka ge motho a

bona maatla a yomongwe. Go molaleng gore dilo ka moka di fetogile maatla mmušong wa *Eros*. Maitemogelo a go ja sienywa sa sehlare a dirile gore selo se sengwe le sesengwe lefaseng se fetoge kgonagalo ya go kaonafatša motho. Dilo tše di nago le beng ba tšhona tša fetoga tše di kgahlago gore motho a kitseele tšona. Mosadi wa motho yo mongwe a fetoga yo a kgahlago omongwe. Tše ka moka di fetogile tlhago mmušong wa *Eros*. Potšišo e motho a beng a swanetše go ibotšiša ke gore se nka ki tšeela sona bjang? Ka go gapeletša goba ka go hlalefetšana. Se ke sona se dirilego gore diakanyo tša dipelo tša bona e le bobefela ka mehla. Mola ba swanetše go bona lefase bjale ka mpho e ba e diretšwego ke Tate le Morwagwe ka lerato la *Agape*, dilo ka moka di fetogile lehumo la go humiša motho le go mo iša modimong.

Manyami ke gore, gobane *Eros* e ke thegile ka se se bonwago ka mahlo, Modimo yo a sa bonwego, yo a ba bopilego o ile a timela megopolong ya bona. Ge go na le Modimo yo a bego gona o be a swanetše go ke ponagatša a tle a bonwe ka mahlo. Gobane batho ba ke neetše matleng a Diabolo, megopolo ya bona ka Modimo ya tlhago ya fetoga ya swana le medumo ya bona; be ba duma go swana le Modimo ka maatla le letago la gagwe ka moka (Isa 14:12-14). Mmušong wa *Eros*, go hwetša le go ke tšeela maatla a Modimo a bego le wona go fetogile go nwelela ga batho gwa mafelelo. Tsela ya go hwetša go swarwa ga botse ke Modimo go direla gore motho a ke tšeela maatla a Modimo gwa ba moko wa di tumelo ka moka tša go bopwa ke batho. Nneteng go tsebana le Modimo wa therešo gwa fetoga lefela, selo se nnoši sa bohlokwa e be e le maatla ka ge a kwišišwago lefaseng. Se sa dira gore batho ba lotšhe mefota ka moka ya dilo ka ge ba tsomana le se sa beng ba bona e le Modimo.

Gobane, le ge Modimo ba mo tsebile, ga ba ka ba mo godiša ba re ke Modimo, ga ba ka ba mo leboga. Ba išitše megopolo lefeleng, dipelo tša bona tša fifala di šolofetše. (22) Ba šilofetše mola ba bata mahlale. (23) Letago la Modimo Mosefetoge, bakeng sa lona ba beile swantšho sa motho mofetile sa nonyana, le sa phoofolo, le sa digagabi. BaRom 1:21-23

Ka go tlhakantšha sienywa sa sehlare le morongwa e bego mosadi, monna a ke thomela borapedi bjo bo godišago tlhago kudukudu metheo ya sesadi. Go ba bantšhi, maitemogelo a thobalana a fetogile monyako wa go tsena legodimo, ka wona mokgwa wo banna ba thoma go fišegelana dikganyogong tša bona; ba swa ba duma le diruo ba fišegela selo se sengwe le se sengwe sa go bonagala se na le maatla, ba se felele ka go fišegela basadi ba bona. Tše ka moka e le

ditlamorago tša tlhago ya motheo wa *Eros*. Tsela ya go rapela Modimo ya fetoga tsela ya go kgopela gore motho a ihweletše.

Dintwa le di phapano gare ga lena di tšwa kae? Mo di tšwago gona šefa: A ga se dikganyogong tša lena di lošanago mo dithong tša lena? (2) Le a duma, la napa la hloka; le a bolaya mme le a galefa, la šitwa go fihlela selo; le a katana mme le a hlabana, mme le se tšee selo ka ge le sa rapele. (3) Le a rapela, mme ga le fiwe selo, ka ge le rapela ka mokgwa o mobe, le kgopela tše le ratago go di tšitlanya le eya le dikganyogo tša lena. (4) Lena diotswa tena! A ga le tsebe gore lerato la lefase [*Eros*] ke go direla [*lerato la*] Modimo [*Agape*]⁸ lenaba. E a ratago go gwerana le lefase [*Eros*] o itira lenaba la Modimo [*Agape*]. Jakobe 4:1-4

Go tsoma maatla go tlhago go, le go raranya ga tsebo ya Modimo wa therešo goile gwa belega bošoro bjo bo bakilego gore lefase la gale le kgogolwe ke meetse. Baile ba kgangwa ke meetse goba lefula la *Eros*. Ekabe peu ya mosadi e be e tlo fetola bjang go masetlapelo a ka moka?

⁸ Lefase le etwa pele ke motheo wa *Eros* wa go ke tsoanela go ke hola mola o swanetše go lemoga gore Modimo o fa gobane ke tlhago ya gagwe.

7. Masetlapelo a Modimo

Morena a napa a šegama, a re motho ke mo diretšeng lefaseng, a nyama pelo. Gen 6:6 (NKJV)

Ka dinako ka moka, go dula go elela merwalela e megolo ya lerato le mohau, o o tšwago sedulong sa bogoši sa Modimo, ye e tlišago bophelo lefaseng. Meboti ye e aperego dihlare, majoba le demela tša mebala le menkgo ya go fapafapana e kgabiša magae a batho. Dienywa tša bose, le merogo e monate re sa bolele ka metšwako e dekete ye e gabišago di tafola tša bona. Dekete tša dipelo di opa ka morethetho wa bophelo bjo bo elelago bo etšwa go yo a bego le go sa hwi. Ke lethabo la Modimo go nea, gomme go tšwa mohla motho a wela sebeng, ga go na pelo ye e bontšhago tebogo, ga go na tebogo ye e tšwago bogareng ga dipelo tša batho. Le ba ba dirago thapelo ya tebogo pele ba eja, mantswe a gona ke a setšo a tlwaelo a a bolelwago ke seboledi goba morapedi go kigotsofatša le ba ba mo theeditšego gore ka therešo ba leboga mola bona ba tlile go bona le go tšea le go ke holela.

E Bitšwa ka gore *terrible twos*. Bohloko le letšhogo le batswadi ba bago le lona mohla maseana a bona a šošobantšha phatla tša wona a re: AOWA! Go telela ga mafelelo, bošilo bo ke gokeletše pelong wa ngwana! Mosadi a le mabenkeleng le ngwana wa gagwe; ge ngwana a bona se se mo kgahlago, seatla napile se a otlologa go tšea. Dipeu tša *Eros* di thomile go tšweletša dienywa tša tšona tša lehu. Motswadi o fetela pele a nagana gore kgopelo ye e tla moyafala. Go kwagala selo sa go fela pelo, ke moka moraloko wa thoma. Ka sebaka se dithato tše pedi ditlhakane ntweng. Ngwana o otlolla seatla, o thoma go goga dilo mo dishelefeng ka ge a ganelela ka kgopelo ya gagwe. Motswadi a ka kgetha go fa ngwana se sengwe go mo fomotša goba a ka leka go gotlelela selo le lešhata le meleko ka moka e tsebjago gore motho a hwetše se a se nyakago. Ka nako ye, thuto le go kgala ka moka ga motswadi go latlhelwa kua. Ye ke tlhago ya motho. Go bontši bja batho, mengwaga le go gola go re ruta gore re hlalefe kudu go tšweletšeng thato ya arena ya go bona, go tšea le go ke holela.

Mengwaga e mebedi mo ngwana a tshwenyago gona, ke tshupo ya mengwaga e lesome tharo go ya pele mo ntwaga eyang e gola, go ganetša go sa swana. Ka nako eingwe batswadi ba gatelelwa ba fela maatla. Ge ba gopola mola bana ba bona e sale ba ba nyane, ba sa ba godiša ba ba hlokomela ka lerato kapela ba

fetoga ba phosa tše ka moka sefahlegong. Ba tswadi ba bantšhi ba tsena ntweng gore ba pšhatle moya wo wa go ganetša. Gantši bomma-bana ba kgopela botate gore ba fokotše bogale baneng ge ba kgala gotella, lenyatšo le go tlhoka tebogo. Batswadi ba bangwe go leka go okafatša thato ya ngwana ba mo rekela dilo tše dintšhi, fela o tšwela pele a sa gotsofale. Tše ke dienywa tše di tšwago go moloji le moithuti wa gagwe.

Ge nkabe re kgona go bona dilo bjalo ka ge Modimo, ra kgona go bona batho lefaseng ka moka ba nwelela moyeng wa *Eros*, ba kgobakantšha dilo tše Modimo a ba filego tšona fela go supetša lerato la gagwe la Agape. Mohlomongwe be re ka thoma go kwišiša masetlapelo a Modimo. Megopolo ya rena e fisitšwe gore e ka kwišiša diphiri tša semoya, ga re dumele le gore o gona. Go na le morethetho o monyanyane wa peu ye e tshepišitšwego ye e opago botebeng bja letswalo, o re botša gore tše ka moka re di filwe ka pelo ye e tletšego lerato la *Agape*.

Ge go boeletšwa moraloko wola wa tšhemong wa *Eros*, motho o ya a lebala gore oratilwe. O ya pele ka go gobokantšha a hloka tebogo, ebile ga a rate go abelana le ba bangwe. Tikologo e eingwe le eingwe ya *Eros* ye e fetolago go-gahlega go be go-nyama, go godiša ledumo la gore motho a hwetše gore a kgone go kaonafatša go nyama ga pelo. Ka mokgwa wo re bona go belegwa ga tlhankišitšo; go swarega selong se se tshepišago lethabo eupša se tlogela motho a le lefela, ebile a nyamile. Tlhankišitšo ke kutullo ye e feletšego ya gore lerato la *Eros* le buša motho.

Gomme kganetšo ya se re bona motheo o bonolo wa Agape yo o reng:

...Le filwe fela, le lena fang fela. Mateo 10:8

Le ge motheo wo o le bonolo o na le maatla. Ge motho a lemoga gore o filwe tše dintšhi, le ena o tlo fa babangwe ka tsela ye e swanago. Ke motho yo a tsebago gore o šegofadišwe yo a ka šegofatšang ba bangwe. Ke motho a phelago ka tebogo etšwago pelong yo a ka gotholelago ba bangwe bjale ka dinoka tša meetse a phelago. Bjalo ka ge go boletšwe:

O nkabela dijo, manaba a ka a ntebeletše; o nlotša hlogo makhura; senwelo saka se tletše wa go falala. (6) Tše botse fela le kgaugelo di tlo ntatela mehla yohle ke sa phela. Gomme ke tlo fetša bontši bja matšatši ke dutše ngwakong wa Morena. Psa 23:5-6

Tebogo e dira gore senwelo se falalele ba bangwe gomme ge se se thoma maphelo a dekete tša batho a kgwathega. Ye ke yona tshepidošo ya motšhene wa *Agape* yo o beng o tlo šegofatša malapa ka moka a agilego lefaseng. Adama le Efa be ba swanetše go ba morethetho wa lerato le legolo la makgonthe le le tletšego tebogo le le elelago ka maphoto baneng ba bona ka moka. Gona bjale motšhene le mogopolo wa *Eros* o be o tšere setulo o buša, moya wa Adama wa fetoga leganata la medumo ya monyamišo wa go hwetša.

Bjale ka ge Modimo a lebelela lefase le go tlala ga lona, a nyaka le ge go kaba o mo tee yo a ka dumelelago peu ya *Agape*, mola go sena tshepo, gwa bonagala monna a dumela.

Ge e le Noage yena o hweditše Modimo a mo lebeletše ka botho.
Gen 6:8

Ke rata bonolo bja temana ye. Noage ge a nagana ka lefase, a lebelela ka leihlo la tumelo go feta tše di bonwago, a bona botho mahlong a Modimo, a bona lerato le mohau. Pelo ya Noage ya tlala ka tebogo. Sephiri sa lethabo ke gore motho a tsebe gore o šegofaditšwe, le gona o šegofaditšwe ke yo a dutšego sedulong sa bogoši sa lefase. A re ka nagana lethabo la Modimo! Ka morago ga makgolo a mengwaga go se na yo a dumelago pitšo ya mohau, tlhase ya tebogo ya benyabenya moyeng wa Noage. Moya wa Jesu o dula pelong ya monna mola lefase ka moka e le lešope. Peu ya *Agape* e a phela go motho. Sephetho sa se ke gore Modimo o kgona go gotholela di šegofatšo ka ena, a pholosa bana ba batho gore ba sa temetšwa ke peu ya *Eros* lefaseng. Noage ke sešupo sa peu e tlileng go tla ya pšhatla hlogo ya noga.

Ka go kithuta gore Modimo o na le botho, Noage o fetogile mokero wa di šegofatšo go bohle ba ka kwago molaetša wa gagwe. Go bona lerato la Modimo la *Agape* go mo fetotše sebjana sa botho lefaseng. Molaetša o be o le bonolo. Lefase le ya mafelelong, gomme bohatse ba gore o tshepa Modimo, be go swanetše go agiwa sekepe se segolo bjale ka taelo ya Modimo go itokišetša tiragalo ye. Ba ba dumetšego Noage, ba itokiseditše go tsena sekepeng ba tlo phološwa. Ba ba ganeditšego Noage ba mmona a etša lesilo, be ba tlo lemoga morago ga nako gore ba ganne tsela e nnoši ya go phonyoga.

Sebaka se ka bago ngwagakgolo Moya wa Modimo o kgopela batho go fetoga motheong wa *Eros*, ba dumelele peu ye e kholofeditšwego ya *Agape* ye e filwego ba ba bontšhago tumelo go Kwana ye e hlabilwego. Batho ba fetola ka borabele, bošoro ba tšwela pele ka go ata. Ge batho ba tšwelapele go gotsofala

ga bona go theowa gwa ba dira gore ba tsome ditsela tše dingwe tša thobalano tša go segiša mengwaga e feta. Bana ba tšwelapele go ba makgoba le dihlabelo tša dikganyogo tše šele, gomme motheo wa *Eros* wa go tsoma ditsela tša go diriša gampe maatla a tlhago gore a gotsofatše medumo ya bona gwa phetha ka dihlabelo tša batho le ditsela tša go robalana tše šoro.

Ekabe sello sa bana ba banyane se be se tshwanetše go tšwela pele go fihla leng, ge ba fetolwa makgoba a go gotsofatša dikganyogo tša banna ba ba gobogilego le ba kgopo? Ke mang a ka kwišišago masetlapelo a Modimo ge a bona bokgopo bja batho? Letšatši ka letšatši, ngwaga ka ngwaga, ngwagakgolo morago ga ngwagakgolo go tsoma lethabo kante ga Yogodimodimo a refago dilo tše ka moka. Go be go swanetše go ema. Le ge go le bjalo, Modimo o ile a fa lefase monyako wa go phonyoga go Mofediši ge le rata.

Sebaka se lekanago le mengwaga e lekgolo le masome amabedi, Modimo o ile a leka go fitlhelela batho ka go rera ga Noage, a ba lemoša, a ba rapela, a hloboša ka lentšu fela batho ba sa tšhekenyega. Le ge di phoofolo di bonagala di sepela di latelana ka setu di tsena sekepeng, le ge go makatša, ga baaka ba tšhekenyega. Di pelo tša bona ga da šuta le ganyane.

Bjale ka ge pula e thoma go na, batho ba thoma gwsa go bona gore maphelo a bona a go hloka ditebogo a fihlile mafelelong. Bjale ka ge legadima le benya, modumo o galefa o tshekenya lefase, banna ba gopola difahlego tša bana ba ba hlokago molato ba fetogilego dijo ba fedišwa dikganyogong tša bona. Lefase le ile la hlatša matšhila le bootswa bja batho le ipuseletša. Tlhago e be e fegelwa ka fase ga bobbe ba batho gomme bjale peu ya lehu ya *Eros* e be e tšweletša dienywa. Banna ba lebelela ka letšhogo magae a bona a swielwa le di-*altare* tša bahedene di pšhatlega. Sello ga letšhogo se kwagala moyeng, bao ba bego le molato ba roga Modimo. Go bonagala kgotlelelo ya Modimo e fitlhile mafelelong, bjale bobbe le go bolawa ga ba ba hlokago molato gwa kgaotšwa.

Tšhohle tše Modimo a beng a rata go difa motho gore a ke thabiše ka tšhona, a abelane le ba bangwe, a fetše a phele moriting wa di šegofatšo tša gagwe gwa ubulwa ke peu ya noga. Ke mang a ka kwišišago manyami a Modimo ge a nagana ka dilo tše ka moka? Le ge go le bjalo, meoya ye seswai ya phologa meetsing. Peu ye e tshepisitšwego ya benyabenya ka kholofelo pelong ya Noage, ya swara kholofedišo ya mathomo a maswa.

8. Monna yo a Šegofadišwego.

Le ge morwallo o be o tlositše bobē bja batho mo lefaseng, mešomo ya bona ya leswiswi ya go bušwa ke ditakatšo tša go hweetša, dipeu tša *Eros* di ile tša tšwelapele go momela bana ba batho barweng ba Noage. Hama ga se a felletša ka go *bona* tatagwe a sa apara, o ile a mo tšeela se sengwe a sa kgaugile, eupša ka morago ga go phafoga o ile a tseba bošoro bjo bo tšweletšego. Mešomo ya leswiswi ya batho ba ba phetšego pele ga morwallo, mešomo ye e bonwego ke Hama e ile ya hwetša bodulo ya tsosololwa go ena, ya thoma tshekamelo empšha ya bobē lefaseng.

Ka go dumela gore a buswe ke *Eros* go gotsofatša ditakatšo tša go ganetšana le tlhago, o ile a ki hweletša lerogo ga tee le bana ba gagwe.

Ya re ge Noage a tlogilwe ke kgang ya morara, ba mmošša se Morwagwe e monyanyane a mo dirilego sona. (25) Yena a re Kanana ke morogiwa; o tlo ba mohlanka wa bahlanka ba bana babo. (26) A buša a re: A go tumišwe Morena Modimo wa Seme; Kanana o tlo ba mohlanka wa bona. Gen 9:24-26

Mo re bona motheo wa bohlokwa wa go tswalana. Ge batho ba rata go ki hweletša dilo tše di dirago gore ba se hlomphe yo a ba fago bophelo, gona moo ba hwetša go rogiwa. Gona ge motho a kitsomela, o ruta bana ba gagwe gore le bona ba ki tsomele, ba se hlokomele bophelo le dišegofatšo tše o ba di filwego ke batswadi goba mang le mang yo a bego ka godimo ga bona.

Morwa wa mathomo wa Hama e be e le Kush, gona wa Kush wa mathomo e be e le Nimirode. Bjale kage tate a ile a lakatša a ba a ki tšeela se se sa lebanago le ena, ka wona mokgwa yo Nimirode a rata go thibela sekgala sa šegofatšo tše a bego a dihloka bophelong bja gagwe o ile a tsoša sešole sa banna a thoma go tsogela mebotō le baagišani ba gagwe ntwā gore a age mmušo wa gagwe. Gen 10:10, 11. Josephus, yo a ngwalago ka *Histori* o re botša se sengwe ka Nimirode.

“Bjale go be go le Nimirode yo a ba dirilego gore ba be le lehloyo le lenyatšo go Modimo. Yena o be a le motlogolo wa Hama, morwa Noage, monna wa sebetē, wa seatla sa maatla. **O ile a ba gapeletša gore ba se bosetše [maatla] go Modimo, okare e be e le yena wa go ba fa lethabo; a ba dira gore ba dumele gore go be go le sebetē sa bona sa go ba tlišetša lethabo**

le. Ganyane ganyane o boeletše a fetola mmušo wa ba wa go bušwa ka kgapeletšo, a sa bone tsela eingwe ya go sokološa batho gore ba tšwe poifong ya Modimo, a ba dira gore ba ikokotletše matleng a gagwe ka dinako ka moka..."

Josephus. Antiquities Book 1 Chapter 4 Para. 2

Mo re bona ditlamorago tša tlhago tša *Eros* tše di dirago gore batho ba rate go kigolela le go kitsomela.

1. Go ke thea gore o na le maatla (Le ka se hwi lehu)

Go dumela gore lethabo le tla ge re itshepa

(Ki tšeele se o se ratago)

2. Go lakatša go laola godimo ga dilo ka moka (Le tlo swana le Modimo)

Ka nnete ge motho a thoma ka tsela ye, o tloga a lebile manyamišo le go rakwa le go ganetšwa ke bao a ratago go ba tšeela se a se ratago. Ge batho ba rata go retwa le go godišwa ke batho ba bangwe, ka tlhago ba tlo tsogelwa, ba ganetšwa, gwa tsoga ntwa.

Ka nako e khutshwane, lefase la tlala la go falala ka tikologo ya *Eros* ya ditakatšo tša go hwetša. Ka ge batho ba ile ba tšwela pele ka go gana nnete ya gore tše ba bego ba na le tšona ka moka ke dimpho tša Modimo, ka mokgwa yo lerogo la go ba lejelathoko ba le kwa moyeng ya bona. Ka morago ga mengwaga emasome amalwa, Nimirode o be a tsositše mmušo wa gagwe yo o nago le sešole, borapedi bjo bo akaretšago thobalano le go hlankela tlhago, le metse ye e rakilego Modimo megopolong ya yona.

Gabedi lefase le be le tletše banna ba go tlala ditakatšo, ba go hloka tebogo. Bontši ga malapa a lefase a be a bušwa ke go kgahlana le go selekišana ga *Eros*, mola a swanetše go bontšha tebogo le hlompho ye e etwagopele ke *Agape* go yo a ba filego bophelo. Gape megopolo ya batho e be e le ya dijo le thobalano, maatla le dintwa, batho ba leka go ki hweletša legodimo. Kanegelo ya Hama le Nimirode e re fa thuto ya mokgwa wo pušo ya kgatelelo e ka thoma ka modiro o mo tee fela wa lejelathoko, ya felela ka madira le bagale bantwa, ba bolayana, ba fediša le go pšhatlaganya ga malapa.

Mahlo a Morena a ile a nyakanyaka go hwetša monna yo pelo ya gagwe e be e dumela gore e šegofaditšwe; monna yo a bego a na le tebogo, yo a bego a ka ba motheo wa go bea lerato la *Agape* lefaseng. Ge Modimo a hwetša monna yo a kgethilego go dumela gore o šegofaditšwe, o be a ka mo gotholela di

šegofatšo a se na letswalo la gore pelo ya gagwe e ka mo hlanogela. Ka gare ga mmušo wa Nimirode wa boithati, monna wa mofuta yo o ile a hwetšwa. O be a swana le lekalana le lenanana le le bjadilwego mo mmung o omilego o o bego o mo dukudugile wa ditakatšo. Monna yo o be a le Aborama. Aborama le ena o be a amegile ke tsela ya go phela ya lefase ya *Eros*, eupša le ge go le bjalo pelo ya gagwe e be e le bonolo gore e rutwe go rata Modimo yo a tlhodilego, a be mogwera wa gagwe.

Morena o boletše le Aborama a re: Tlogela lefase le la geno, le metswalle ya gago, le ngwako wa tatago; o ye nageng ye ke tlogo go laetša yona. (2) Gobane ke tlo go dira setšhaba se segolo, ke tlo go šegofatša ka godiša leina la gago; mme wena o tlo ba tšhegofatšo. (3) Ke tlo šegofatša ba ba go šegofatšago, ka roga ba ba go rogago; mme meloko ka moka ya lefase e tlo šegofatšwa ka wena. Gen 12:1-3

Hlokomela gore Modimo o rile o tlo šegofatša Aborama, gomme le ena abe šegofatšo. Ke monna yo a šegofaditšwego fela yo a ka bago šegofatšo lapeng la gagwe le motseng wa gabo. Modimo o be a tlo dira gore Aborama a be monna yo mogolo, gona se a sa se direle gore a ke kgotsofatše ka monono wa lefase, gomme e le gore a šegofatše malapa ka moka a lefase. Kgwerano ye e be e se bonolo ka ge e kwagalago ka gona. Dipeu tša *Eros* tše a hweditšego e le bohwa bja gagwe go tšwa go Adama be dira gore Aborama o be a swanetše go ganetšana le pono ya gore dilo tša botse di tla go bao ba di nyakago, ba go tsentšha matsapa a go di tšea. Ge Modimo a re o tlo šegofatša Aborama peelano e be e le e tee fela – tlogela lefase la geno, setšo sa geno se se tletšego borapedi bja medingwana e šele, tlogela tše ka moka, o sepele le nna. Fela go ba setšhaba se segolo go ka se be moroba ka mogwa yo! A go kgonege! Go tlogela morago batho ba ba ka go thosago go namelela, le go ya go dula sekgweng goba nageng mo go dulago batho ba go balega, le gona ba go ba le meetlo le mekgwa ya go se tlwaelege. Se a se kwagale e le tsela ya bohlale ya go fetoga setšhaba se se golo le sa maatla.

Aborama o ile a kwa a latela taelo, a tlogela morago tše a bego a di tlwaetše. A latela tsela e e be e bonagala okare e ganetšana le go ba setšhaba se segolo. Gapegape Modimo o boeletša kholofedišo ye a e dirilego go Aborama.

Gomme Morena a iponatša go Aborama a re: Naga ye ke tlo e nea bana ba gago. Gona moo Aborama o agile aletara ya Morena yo a iponaditšego go yena. Gen 12:7

Aborama o ile a tlhakana le di tlhohlo tše mmalwa, eupša e kgolo go di feta e be e le ya gore o be a se na morwa. Ge Aborama a be a tlile go ba setšhaba se se golo, o be a hloka gore a be le morwa le ge e ka ba o mo tee. E ka be o ile a tšwela pele a dumela goba o ile a phetha ka go dira se sengwe ka se? E ka be o tšwetše pele a tshepa yo a mo kholofeditšego goba o ile a dira morero wa go phethagatša tshepišo a le nnoši? Ka bošego bjo bongwe ge a nagana ka dilo tše, Modimo o ile a mo etela.

Aborama a buša a re: A ko bone, ge nna o saka wa mpha ngwana, bohwa bja ka bo tlo lewa ke motho e a tswaletšwego motseng wa ka. (4) Bjale Lentšu la Morena la mo tlela la re moji wa bohwa bja gago ga se eo; bohwa bja ga go bo tlo lewa ke e a tlo go tšwa mmeleng wa gago. (5) Bjale Morena a mo ntšhetša ntle a re: Lelalela legodimo, o bale dinaledi, ge o ka kgona go di bala. Mme a re: Bana ba gago ba tlo ata ba etša tšona tše. (6) Aborahama a dumela Morena; mme Morena a mmalela tumelo yeo a re ke gona go loka. Gen 15:3-6

Se ke sephiri sa bonolo se se išago golokeng: Dumela se Modimo a rego o tlo go šegofatša ka sona. Dumela gore o motho yo a šegofaditšwego. Ke phetho! E ka be ke eng se Modimo a šegofaditšego yo mongwe le yo mongwe wa rena ka sona?

Yena, e a sa kago a tšebafa Morwagwe wa ruri, a mo gafa ka baka la rena ka moka, a ka lesa bjang go re nea tšohle ka yena! BaRom 8:32

Ge Modimo a re neile Morwagwe, gona re ka tseba re se na kgakanego gore o re neile dilo ka moka. Se re hlokago go sedira ke gore re mo dumele. Se ke sona se Aborama a se dirilego.

Aborahama a dumela Morena; mme Morena a mmalela tumelo yeo a re ke kgona go loka. Gen 15:6

Se ke sona sephiri sa lethabo kamanong efe goba efe; ye ke yona tlhase e etlileng go tšhuma lerato la Modimo la *Agape* pelong ya motho: dumela gore

Modimo o tlo go nea se a se tshepitsitšego, o dumele gore le tše o bego le tšona di tšwa go yena. Ge o dira se, bjalo ka Aborama, o tlo fetoga motho yo a šegofaditšwego, motho yo mo bjalo o tlo tlala la go falala ka lerato la go fa babangwe dimpho bjale ka ge le ena a filwe.

Se ke sephiri sa go dula le lethabo la go sa fele lenyalong. Ge o nagana ka tše o di filwego, o tlo rata go fa babangwe. Gomme ge o dula o nagana ka tše o swanetšego go di amogela, o tla dula o tšea gore o dule o amogela fela. Ekabe molekane wa gago ga a go sware ka tsela ye o swanetšego go swarwa ka yona? Mosware ka tsela ye o naganago gore o swanetše go o swara ka yona! Ga go na se o ka bang le ditebogo ka baka la sona? Ekabe Modimo ga a o fepa? A go apesa? A go fa lefelo la go fitlha hlogo? A ga wa bona maloba a dikete a botse? Letšatši ga se le go hlabele? Ekabe Modimo ga se a go pentele lefaufau ka mebala ya botse ya gauta letšatši le dikela? A ka nnete o ka bolela ware a wa šegofatšwa?

Go molaleng gore se se ba boima ge molekane yo mongwe a na le boithati le bo laudi. Ge re swarelela seetšeng se Modimo a re neilego sona, dilo tše dintši di fitlha ke mahlomola, gomme ge re ka lesa go bona dilo tše re ka lebogang ka tšona, re tloga re kineela boithating ra fetoga ra swana le molekane wa rena, re tletše mahlomola a boithati le go kikwela bohloko.

Hama le Nimiode be ba le banna ba go rogiwa gobane ledumo la go tšea le go hola gore go hwetšwe lethabo le phetha manyaming nako ka moka. Ge re tšea gore re hwetše lethabo, gona re barwa ba banna ba go rogiwa, le gona re tlo roga ba bangwe. Aborama o be a le monna wa go šegofatšwa. Ge re le bana ba Aborama, gona re swanetše go dumela gore re bana ba monna yo a šegofaditšwego.

Ge re le bana ba monna yo a šegofaditšwego, gona ruri le rena re šegofaditšwe.

Gomme yo a šegofaditšwego o tlo šegofatša.

Le filwe fela, le lena fang fela.



Lerato La Makgonthe

Re kholofela gore di pelong tša rena re ka
busetšwa leratong la makgonthe.